





原件短缺

P35 上半页缺



利害者天下之大也

天下

不能無害也惟利之中而

其大者以從之

其利而卒不睹其害有害不能無利也惟害

其小者以從之則天下雖不能被其害而亦失其

爲利惟利之疑於害而害之疑於利也苟非慎擇而審

從之則未得其利而先受其害既不能除其害而且失

其利此固天下之至難而識治者之所當亟爲之圖者

也執事不知愚之不可與言而以海防之計取畫焉愚

則安能知之顧嘗竊議之矣今之談海防者輒曰兵食

兵食非二策也不可一日缺兵則不可一日缺食故今

之最急者不在於策食而在於策兵愚不知其他而

於閩則以爲客兵之爲利者一而其爲害者二閩兵之

爲利者三而其爲害者一何以言之方島寇猝至勢至

急也當事者無以爲計則不得不徵之客兵及其披甲

搃纓持戈吹角揚揚而來也使其賊至而能馳之而有

所俘獲以歸亦足以薄收咫尺之功而暫紓斯須之憤

所謂利之一者此也然而客兵者悍而貪不可法馭者

也賊之至也則必先倍其餉呼其酋長而勞之未及負

戈已糜千金矣既偪賊壘可攻也顧解甲而坐以多索

我金金至起而分金而賊已鼓噪去矣然後卷甲而趨

之卽不獲一賊亦揚揚而回又責我勞也執事謂客兵豈咸勁可恃哉幸不勁耳使果勁而殺賊卽坐而金盡何以繼之此其爲害者一也執事又謂其往來數千里侵掠殘害數千里外遠矣愚不能知卽近而省中繩之以法猶曠而難制則其持戈野掠又何問之哉無論有司者懼不敢問卽其酋長亦多匿其餉金一任之矣甚者又從而令之此其爲害者二也夫客兵之爲害至著也然而重視客兵輕視閩兵者何哉誠懼夫閩兵之不足恃也而事有大不然者且今歲至而長樂鎮東興泉同惠之間危矣乃卒無事者則咸其鄉人共持之賊之

逼長樂也其人伐木爲挺伏於莽中賊至輒大呼而逐之無不被靡至嚙指相誡勿犯長樂也長樂人非閩人哉鎮東之圍蓋一月至急矣乃城中人則日日緝引數十人於城外禦賊賊稍近則握亂石擊之無不捫首而去者雖其肆掠山中固未有一人持戈逼城也當事者慮其急則檄兵數千往援而城中人謝不納曰無慮我弱而不能抗敵恐食盡不能空腹立耳卽鎮東人者非閩人哉是閩兵近而能守者其利一也往歲越警亦嘗徵兵於閩而閩兵之入越也輒能先驅走敵以故吳越人輒稱閩兵閩兵云卽今之賊旣去而要擊之海中至

沉其數十大觴無一生還者固閩兵非客兵也無論兵
卽諸生中亦有張空拳縛之而獻者是閩兵之遠而可
戰者其利二也夫客兵者卽使勁而可恃而又畏不爲
害亦安能使之常操戈數千里之外以障我哉乃閩兵
者使之守卽所以守其父母妻子也而使之戰則又朝
令而朝行夕令而夕行固不敢坐而挾我金也而其食
之也十人之直且不足以當客兵五人直是閩兵之
可以常恃而且不費者其利三也然而有一害焉夫今
之所謂機兵弓兵者卽食我之食而我之所恃以守以
戰者也今乃令其人世守其役而世食之且令也役其

十之二丞也簿也役其一執牒勾攝譁於道路者咸是
人也而當事者輒曰此何足恃而當別募之兵夫旣不
足恃則當奪其食矣旣不奪之食又別募之兵而重食
之宜百姓之所爲大困也是其一害也然其害也非係
之兵而係之練兵者也愚之所謂練兵者非今之所謂
練兵也則欲以八府之兵而分責之當事者卽身至各
縣而月練焉其兵之役於官者旣精之矣懼其少也則
又於二十五家而擇其一人以爲之兵以言乎練之之
具也則無踰弓者弩者礮者三者固中國之長技而賊
之所最畏焉者也以言乎練之之法也則以此三者而

五日一試焉又五日再試焉其有十發而五獲以上者是上兵也宜賞者也其有十發而三獲者是中兵也不賞不罰者也其有十發而僅二獲一獲不獲者是下兵也宜罰者也宜賞者不必別予之則予以五日之食宜罰者不必鞭之則奪之五日之食其所予者卽其所奪者也夫食也人之養其父母妻子而不令餒焉者也日日而倍其所入固欣然喜矣日日而奪其所有以與人固怫然怒矣無論其人卽其父母妻子亦不肯一日而使其人之怠於其事也如是而兵未有不精者也旣月練矣去則付諸其縣之令已又間詣而試焉其兵之精

倍之是令之勤也再倍之是令之尤勤也則狀其勤於上而請賞焉如其初或不及其初是令之惰也國之大事在戎此而惰咸惰矣則狀其惰於上而請罰焉令也蓋無甘於惰者兵益精矣一縣而以精兵稱者五百則一省而以精兵稱者二萬矣豈不赫然威盛哉此練縣兵之法也於是選其精者數千戍之各寨謂之寨兵寨兵者水兵也賊未有不制之水能制之陸者也故最精者戍之則付諸督水兵者如其法練焉選其精者數千戍之省中謂之省兵省兵者陸兵也賊之至也不水則陸故精者戍之則付之督陸兵者如其法練焉郡之在

海上者春汛秋汛則調其縣及他郡之縣之兵數千戍之過汛則遣謂之郡兵郡兵者水陸之援兵也且以守其郡也則付諸督郡兵者如其法練焉此練水兵陸兵之法也夫兵之在官者既有定食矣二十五家而一兵者則令二十五家共食之卽多直十金耳又計貧富而盈縮焉則富不過一金貧不過十人一金也其費甚省故事軍餉納之官恒什一收之其散也恒什一除之是民常多出而兵常少獲也茲令自收而自給之猶之取之家而與諸其家之人也其法甚便此食縣兵之法也縣兵者食於縣矣其調之寨則寨食之調之省則省食

之調之郡則郡食之三食者安出哉屯田者正戍閩之兵而使之自食者也其餘餉併其所入之租是可以請而留焉者也上杭河稅者先南贛督臣留作兵餉者也當是時閩無督臣故歸之贛今設督臣矣則以閩之食食閩之兵理也且南贛者分也閩者專也無他餉也此則可以請而歸焉或分焉者也其他糧剩之餘也各郡練兵之需也咸可佐餉者也此其食水兵陸兵之法也閩故僻在海隅其人類喜爲儒不儒則農終年率其孳息而雜作田隴董董焉數其粟芋以給朝夕卽更繇亦苦之又預收其直或倍其直而里胥又因之苛征固宜

其憂嗟怨嘆仰天而呼也兵練則冗兵以裁兵精則冗食可省此急民之至計而萬世之長利也雖然愚又有說焉客有見其隣荒其田而貸粟以克餒者則教之曰何不耕而田然非謂朝耕而夕穫之也既耕之矣且貸粟以需之及其穫也始可以無貸若恃耕可克餒而故不爲貸是益之餒也今夫練兵節食是耕之說也百世之計也客兵而取諸民以養之是貸粟之說也一時之計也客兵可罷矣而兵固未練也賊而猝至孰執其咎乎食固可省矣而客兵固難遽罷也紛然而索我之食何以應之乎此所謂利之疑於害而害之疑於利者也

夫人之保家未有不善者也乃其謀國則不及其家者踈之也夫人之愛子未有不盡其心者也乃其爲民謀則不及其子者忽之也惟執事者之於閩也不閩視之而家視之其於閩之民也不民視之而子視之則其斟酌利害之原而委曲從違之幾必有道矣愚則安能知哉愚則安能言哉

用才

真似

嘉靖辛酉應天

問自昔孔子蓋稱才難其述唐虞以及有周上下數
 千年間十餘人而已夫十餘人者信賢且聖然必
 賴衆助以為功而十餘人者獨稱才歟自漢以來
 異才輩出畧可睹記亦有彷彿於隆古者歟我
 太祖高皇帝起淮甸而創丕業 成祖文皇帝舉
 義師而靖內難一時英雋之士雲合嚮應桓桓焉
 矯矯焉斯亦曩五臣十亂之朋已其勞勩之蹟可
 得聞歟說者謂天造草昧英才乃產今觀往牒以
 及 昭代得人之盛大抵皆建國之初也豈光岳
 之氣蓄厚於始而漸靡於後耶 國家承熙洽之
 後英哲濟濟然盛矣十餘年來海內時聳南北用
 兵而當事者輒稱乏才豈其隆替信有時歟夫人
 才難得蓋亦難知昔人所云五觀八徵果人物之
 藻鑑歟迺其事可悉數歟願極言之以觀用世之
 槩

嘗謂世之需材也無古今而材之需用於時也有虛實

虛實之判真似之辨也盛衰興替之所繇至相懸也執事留意當世人材欲振師師之風以仰禪 聖天子中興之治甚盛心也愚請先辨所謂材者而後竟其說焉夫天下有真材有似材玉之爲璋瓚環玦不同而均之堅良金之鈞鎰銖兩輕重不同而均之適於用真也驪牛之黃也似虎幽莠之幼也類禾白骨疑象砥硃混玉似也夫人之材亦有真似焉謀必中的戰必摧鋒投必如意重必克舉功不以倖成義不蘄苟就處劇而目不瞬臨難而志不滑或木彊少文而有不可奪之節或言不出口而有當大任之勇若此者真材也滑稽似智多

端似通機譎似深矯訐似潔順比悅澤文也而劇實則誣慷慨扼掣毅也而臨事則悞家起文墨而高議韜鈴之術身居閫域而指據九野之圖覈功則百不掩一立議則實不中窾若此者似材也夫真材不必衆也得數人焉可以王矣似材舉皆是也卽肩摩踵接安所賴之然真似難辨而似者易售也何則真材有所長容有所短故瑕瑜不相掩而似者恒匿瑕以眩愚真材能乎此或不能乎彼故職守不相兼而似者恒并羅以示廣真材工於臨事而拙乎豫言似者工於豫言而拙於臨事故相馬以肥而飛兔騶裊漏矣相劍以室而吳干越鈞

置矣嗚呼非天下之至精孰能辨之歷觀前代興王之
主莫不各有佐命之英唐虞三代詩禮紀之矣粵若炎
劉初建則蕭曹張陳贊其謨光武中興則馮鄧吳賈宣
其勛李唐受命而房杜英衛之儔興藝祖肇基而趙范
潘曹之佐集及我太祖高皇帝仗劍而起淮甸壯士
景從異才雲集徐常奮於徒隸李沐育於孤孽康廖拔
於降附劉宋錄於舊史章秦起於諸生智者獻其謀勇
者贊其決思發如泉涌兵威如電迅是以高皇帝以
一旅渡江而創丕業也迨成祖文皇帝舉義而靖內難
哲士知幾義夫識至籌畫則金忠廣孝將帥則朱張劉

鄭股肱則丘黃蹇夏謨議則金解三楊抱竒者思奮擇
主者歸心將經百戰之餘士極一時之儔是以文皇
帝以偏師南指而造隆基也自今觀之當時十俊所萃
殆若天授神賚間氣獨鍾有非尋常所能彷彿者何其
盛歟然遡觀往牒以及昭代大抵人物之茂皆特萃
於草昧建國之初而乏材之歎顧每興於重熙累洽之
後若是者何愚竊有以闕其故矣夫天下之人至無算
也其號爲有材者百一而已有材者又不必其皆渠傑
也其號爲標鋒者萬一而已天下治平無事良鴛並羈
猛懦混繫風塵起而銳者脫矣當此之時相使以智而

智之中又有智者焉相角以勇而勇之中又有勇者焉法從人立而人不爲法牽位由才授而人不敢倖取甘苦別於嘗試利鈍決於剗割彼飾貌僞詞依娜枝拒曾不足以膏英雄之蕭斧而區區矯情詭故所以罔衆賈譽者固沛公周勃之所東向而嫚詈之者也是以耳目無所眩而真材出焉挾拘攣之網而豪者奮批雌黃之口而質者顯解牽制之繼而逸者趨樹賞罰之幟而赴者信名實相核奚爲不成如是卽謂之多材可也及其久也法紀密矣科條布矣上操積常之勢而下徂一切之習以耳目從形跡以趨舍從耳目是以有高世之志

者或負遺俗之累信必然之畫者或挂詬訾之罟於是真者無以自見而疑似淆焉處暗而冀掩其盲並坐而不知其覺心越也而貌秦質烏也而聲鵲始則以似亂真繼乃染真爲似本情愈不可知而積習易以生惑上下相貿奚爲而得成乎如是卽謂之乏材亦可也由是觀之天之生材固非爲始者之增多而後者減算也而古之人又非傳翼胼肢殊形詭狀不可肖似也顧識真悅似時不同耳 明興垂二百年 列聖重光治化汪濊至我 皇上又以神聖繼統壽考作人英雋之選布列中外可謂極盛十餘年間南戡北掃率皆 皇上自

發廟謨諸臣罕有攄竒挺任以紆宵旰之憂者一當叢劇輒患乏材豈天下之廣兆民之衆乃竟無以佐下風備任使耶亡亦風尚之異習而棟練之未精耶嗟哉每念至此熟也蓋其弊有四焉試終其說而毋諱可乎夫所謂四弊者才具莽於素蓄聲實忽於叅驗是非聽於衆口授使限於身格也夫車有輔貳衣有儲笥所以代匱也今平居不熟人之所宜而咨求於匆迫則措置草具而不審矣名以賓實實以辨事今豔其虛稱而不綜覈於積効采其始議而不反覆於稽終則首尾盤戾而不忌矣賞罰者上之操也是非者應賞罰者也今或

一人之身朝由而暮距倏潔而忽汚於是賞罰莫可必而寄權於衆口矣身格者階進者也才器者任官者也今不惟其材器之所宜而惟論其身格之繇起則撥華者常躋而抱實者頽首矣夫欲應卒之不匱則莫若因便而預養之方用其人遽思其代焉可也欲聲實之不爽則莫若決之於叅驗以反覆其聲稱覆之不契誅罰必加焉可也欲是非之不謬則莫若究橫起之議而破訾譽之私灼知篤任雖三至不惑焉可也欲才器之當任則莫若削身格之限操激勵之權其才可使卽輿隸無擇焉可也如是則人之材具較若白黑信若列眉而

人莫不輸慊畢忱以事其上矣以此建事何事之不成
以此圖功何功之不立又奚必嘉慕徃哲借材異代哉
愚所謂棟練之貴精者如此若夫李克所謂五觀劉劭
所謂八徵者槩以觀人爲旨未叅風尚所宜固不足爲
執事者道也然愚復有慨焉夫人材之於世也譬之音
也鼓宮而宮應叩角而角應非其類不應也世能識真
則人皆剖其真以求售世方悅似則人皆藏其真以俟
時夫至於使人藏真以俟時非國之福也昔者齊伐魯
取饒鼎魯以贖應之齊人知其誑也曰必以柳下惠之
言爲信魯人以告柳下惠曰奚不以真者與之曰吾所
愛也柳下惠辭曰吾亦愛吾鼎由今觀之夫士亦有鼎
也用材者其毋使士自愛其鼎也哉

文字

嘉靖辛酉應天

問文字之興與天地並自鳥跡代繩其制日炳代既
 相沿體亦互異辟之鎔範所擬各有司匠周書云
 詞尚體要蓋防其濫也夫文至六經尚已迨百氏
 繼起雜文遞興或典誥或誓問或畧覽操引家驥
 人壁何所宗本往有編為正宗續為辨體者其嘉
 惠誠渥矣可悉其指歟字至六書備已迺墨士代
 出體裁互變或刪籀而篆或易隸而楷八分行草
 幻以飛白碁布櫺列何所淵委往有纂為書法鈎
 玄字學新編者其用心良勤矣可述其槩歟或者
 以質文代變一因乎時或者則以聲畫互形一因
 乎人茲二說者果盡然歟今世文日以繁字日以
 以簡風靡波馳古制莫講議者謂宜考古程今以
 昭一代同文之盛而未睹其便也子多士習心于
 茲久矣試盡言之毋讓

執事策士再四不因其未知攻其所未習而以文體字
 法之變下詢豈以多士故習為文字者哉夫操千曲之

引而後可以審音觀千劍之劍而後足以辨器士也鄙
何明問之辱試以所習聞者求正焉可乎夫自玄黃色
判方圓體分文字之興與天地並是故日月疊壁垂麗
天之象山川錯采陳理地之形林籟結響於球鏗虎豹
凝姿于炳蔚雲霞組綯有踰畫工草木賁妍無資紅女
當其時玉版金鏤之實丹文綠牒之華誰其尸之亦神
理而已所謂六璞不斷太羹不調太音希聲者也文字
之制于斯殺其端矣沿及中世結繩易而書契迭興鳥
跡明而字文日廣置言有區造形有宅外文綺交內義
脉注跼躄相銜衢畛各異如繩墨之審直斧斤之斲曲

巧者不得獨谷拙者不得獨漓故語文而不於其體之
是求語字而不惟其法之是據則雖玄解之宰獨照之
匠其何以尋形律以定墨闕意象而運斤者哉夫皇王
尚矣三墳五典八索九丘孰非文也代既綿曖聲采莫
追至夫子刪述六經而大義始炳易張十翼書標七觀
詩列四始禮正五經春秋五例六經既明百氏繼出諸
所撰著家驥人璧莫不宗本於斯焉故詔造策檄則書
之流也序述論讚則易之流也歌曲賦頌詩之流也哀
誄唁賻禮之流也書奏箴銘春秋之流也執事曰文以
六經爲尚蓋言體也伏羲氏龍書神農穗書軒之垂雲

禹之鍾鼎孰非字也隨見制象偏滯莫通至周官具載六書而大寶始耀一曰象形二曰會意三曰諧聲四曰指事五曰轉注六曰假借六書既列墨士飜起諸所染構樞分碁布莫不淵委于斯焉故書肇于形形不可象則求諸事也事不可指則求諸意也意不可會則求諸聲也四者不足而後假借轉注行焉執事曰字至六書而備蓋言法也暴秦崛起興事不師古虐焰熾而雜文遞增法吏師而古文遂變漢魏以還濫觴益甚對問肇於宋玉而曼倩之客難陳思之客問固之賓戲衡之應問寔之客譏豈之釋誨景純之客傲皆倣而廣之七發製

於枚乘而毅之七激駟之七依瑗之七厲仲宣之七釋左思之七諷皆踵而繼之連珠演於楊雄而杜賈潘劉之輩擬者疊見雖其窮竒極侈甘意搖骨盛氣於詞場溢藻於文囿碎之歌聲靡曼而抗墜之節莫聆六經之體蕩然無復存者然則採歷代之俛響泳先哲之芳潤選義按部考詞就班真西山正宗之編吳海虞辨體之續豈非有功於斯文者哉觀其首辭命而王言以尊次叙事而紀載以具次議論而理奧以昭次詩賦而雅道以振網羅上下一以明義理切世用爲主而辨體之作每體自爲一類其稱序原作之意悉本於儒先之成說

數千載文體之正變可寓目具睹矣其嘉惠不亦渥乎
小篆作於李斯而李陽冰實祖之蓋增損大篆異同籀
文而用之鐘鼎符印者也八分作於王次中而梁韓董
實祖之蓋割隸八分而取其二割篆二分而取其八所
謂小篆之捷者也隸書肇於程邈而剛繁就簡施於徒
隸蓋八分之捷也章草作於黃門令史游草書作於張
徵士伯英而章草則隸書之捷草亦章草之捷也行書
者劉頴川所造卽正書之小僞飛白者蔡邕見聖帝而
作卽楷制之變也雖其含毫濡翰雲滃風駭罔不取鎔
往裁自鑄來冶辟之舞容迴環而綴兆之位莫考六書

之法泯然無復見矣然則剔羣哲之瑕瑜溯六藝之澌
瀝陽秋先後袞鉞臧否蘇霖鈎玄之纂劉惟志新書摘
抄之集豈非有功於字學者哉觀其始於蔡邕鍾繇之
論繼以右軍隱居之說八訣三十六法之書十法十體
之斷書譜續譜之編米劉蘇黃朱張之評旁收備錄一
以具點書記姓名爲式而摘抄云者每篇括其數義低
昂軒輊之等悉本於古昔之成訓數千載書法之正變
可指掌無疑矣其用心不亦勤乎嗟乎文質之代變也
如時序之代謝然雜文興而經訓漓然經訓不能不漓
而爲雜文雜書出而古文變然古文不能不變而爲雜

書是故黃唐之文淳而質虞夏之文質而辨商周之文麗而雅楚漢則侈而盪矣魏晉則淺而綺矣唐苗而排宋繁而鑿時也古文如春籀如夏篆如秋隸如冬八分行草歲之閏餘也亦時也沿雜文以測經訓執雜書以希古文是返玉輅於椎輪移江河而行之山也必無幾矣劉生有言文章與時相高下非通達之論耶若夫體沿習遷才以質異賈生雋發故文潔而體清長卿傲誕故理侈而辭溢安仁輕儇故鋒逸而韻流士衡矜重故情密而詞隱以至晉書流宕唐法謹嚴昌黎性端重而書跡勁道安石性偏僻而字勢峻迫觸推以類表裏必

符豈非才性之異區黼藻之懸品哉夫材有天成學慎始習斲梓染絲功在初化器成彩定難可翻移楊子曰文心聲也字心畫也聲畫形君子小人見矣非根極之見耶方今 聖曆熙明文思克被環海內外漸漬於耳目鼓躍于心志懷瑾握瑜之士軒翥而欲奮飛騰躑而羞跼步罔不淵嶽其衷鳳麟其采搖筆散珠動墨橫錦微言與旨函滿玄席郁思醲華瀟灑藝苑辟之馭神龍於天衢騁騏驥於萬里烺烺彬彬跨周轅漢蓋千載一時維新之會矣然而心聲鋒起名實互垂膚葉叢萌神髓淪喪文日以繁字日以簡誠有如執事之所憂者先

王之制浸浸乎淫淫乎瀾倒而莫之障馳騫而莫之返
矣其何以擇源於涇洧之派按轡於邪正之岐哉則夫
考古程今以昭一代同文之盛搜孔壁之遺循蒼頡之
跡使脩文之哲簪筆之英稟經以裁訓酌雅以富言神
叅金石之邃冥覽繩契之前而文體復淳字學丕變維
世者誠所不容已於議矣雖然愚嘗習籌之而得其故
焉夫文者從心生者也神理者自天出者也是故太極
立而陰陽分陰陽分而形氣判衣冠人物而揖讓周旋
之體以存蟲魚鳥獸而屈伸飛動之理以寓齒牙角骨
而咀嚼擺拉之勢以昭故精於理者古今不能鬲妙於
心者體法不能闕任心而成隨手而變顧盼可以驅辭
力次唾可以窮文致雖洩秘圖書掩竒科斗衙官騷雅
之選奴隸鍾王之輩可也奚必刻鵠圖龍竟慙真體得
魚守兔猶恡筌蹄者哉嗟乎此執事能事也士也日窘
束於體法之中而廼高論神理之上非瞽則狂執事其
進教之

天象

嘉靖辛酉浙江

問堯命羲和推星鶉星火星虛星昴之象以明時也
 後世占候之說雜述機祥無稱論著惟象緯布列
 其精魄不遠於人而太史所職曰察天文紀時政
 則於天人之際未可謂遠不相謀其所稱會留客
 散羸縮陵乘歷繞鈎獨食犯守遷之象皆所必察
 者也使於垣次之所奠名稱之所指十二辰十二
 土二十八舍之屬一或不祥其說則雖欲察之而
 無從也故察之而應則占驗之說端未可以術數
 薄之而漢之所以失者何居察之而不應則天文
 之職又非時政所有事也而太史之且以兼之者
 何居二任之官分於何代占一之術精於何人茲
 欲破其推驗之謬而復有裨於敬畏之實諸士其
 詳之於篇以盡天人之蘊

運造化之妙者數也亦理也探造化之妙者心也非迹
 也理也者乘乎數者也心也者具乎理者也天道之運

日月之行星辰之旋繞固氣也而非理以存主之則所以爲宿離出沒之度將旦夕不侔而春秋異軌矣惟吾人者探之以吾心所自具之理則觀象而纏度有紀稽數而經緯有考審序而盈虛有時可以擬議其始終而不少紕謬焉矣苟昧其理泥其數按其故迹而不會之以心粗亦甚矣又何以觀天文而察時變也哉孟子曰天之高也星辰之遠也言天莫辨於此也而歸之於已然之故焉易曰日月相推而明生焉寒暑相推而氣成焉言天亦莫辨於此也而歸之於自然之理焉則古人之所以知天者從可求矣是故仰觀於天俯察於地伏

義之圖也常儀車區大撓黃帝之占也南正司天北正司地高陽之命也帝嚳式序三辰唐虞義和維軌夏有昆吾紹德商有巫咸明紀在周則有馮相氏掌歲日月星之位以辨四時之序保章氏觀星辰日月之變動而辨吉凶乖別之妖祥如梓慎望氣而知宋鄭之多喪師曠歌風而知楚師之敗績皆掌著天文各占圖驗而爲後代所宗矣在漢則有馬遷天官之志張衡靈憲之經在唐則有淳風法象之志一行覆矩之圖在五代則有王朴曆畧之制在宋則有沈括宣和之議繼以郭守敬儀表之著而諸家皆出其下矣蓋嘗溯而論之一元之

氣周流太虛之間未有天地先有水火此一則神兩故
化之理也惟火極清則爲天爲日星爲風雷惟水極濁
則爲山岳爲雨露爲霜雪所謂散殊而可象爲氣清通
而不可象爲神是也盈天理間孰有離陰陽而可以爲
造化者哉夫天以輕清之氣而運乎上一晝一夜而過
一周其道左行日月五星亦以輕清之氣而麗乎天日
不及一度月不及十三度隨天而左轉日有中道月有
九行日月相推歲凡十二會方會而月光盡滅而爲晦
已會則月光復蘇而爲朔舒遲先後近一遠三則月斜
倚而爲弦相與爲對當天之中則月光正滿而爲望晦

朔而日月之合東西同道南北同度則月掩日而日爲
之食至望而日月之對同度同道則月元日而月爲之
食日至角牛之方月行青赤之道則爲春爲夏日至婁
井之方月行白黑之道則爲秋爲冬日道發南去極彌
遠其景彌長遠長乃極冬乃至焉日道歛北去極彌近
其景彌短近短乃極夏乃至焉二至之中道齊景正春
秋乃分焉日月之光聚而爲星中元爲北極上元爲太
微宮下元爲天市垣二十八宿衆星者言乎其經也金
木水火土五星者言乎其緯也其曰會者言乎日月星
辰之所會也其曰客者言乎辰星之不出太白也其曰

主者言乎辰星之出乎太白也金木附日一歲而周天
火二歲而周天木十二歲而周天土二十八歲而周天
故曰有遲有速北極則出地上三十六度常見不隱南
極則入地下三十六度常隱不見故曰有伏有見朝出
曰羸夕出曰縮西行曰迷日月度曰陵不順不逆曰留
芒及曰犯妖變曰孛含譽之射示其喜也格澤之生示
其怒也執法郎官象其官也明堂靈臺象其物也此其
理之精深而存乎物感者也後世之言天者吾惑焉蓋
天之說有其術而無其驗宣夜之言有其名而無其傳
而况謂斷鰲鍊石尤爲不經日月蟻行晉志之妄燭龍

銜火天問之誣也而况謂揮戈棄杖尤爲不稽蟾蜍玉
斧未知借光地影之理也支石仙槎未知天演地紀之
義也草生木落談風之謬也石牛黑蜺論雨之誕也仙
火金門言雷者未確也堯壁漢鼎言雲者無徵也銅駝
玉馬言雪者非真也以十二邦係十二次鄭玄之分星
失之拘受封之日歲星屬之賈氏之分星失之罔月令
作於不韋而所舉中星異於堯典圖籍精於馬績而所
論星數異於張衡大角一星也兩朝至以爲屬亢而中
興志則屬角庫樓十星也丹元子以爲屬角而兩朝志
則屬軫星官之書迄無定論此無他泥於數而遺其理

執其迹而弗通以心又何足以上達天載之神也哉馬融有言上天之理不可測知天之事者惟有璇衡一事則求夫得天之實者惟渾天儀近之矣蓋璇衡之制起於高辛氏而虞舜察之以璿爲璣而用以轉動是之謂璣以玉爲管而橫置其中是之謂衡璣以定天體衡以齊七耀卽今之所謂渾天儀也是故黃帝得之曆起辛卯顓帝得之曆起乙卯曆之所作非渾天不可也青道二出黃道東朱道二出黃道南道之所出非渾天不可也錢藻則以朱黑白而別三家星葛衡則以青白黃而別三家星以考星宿非渾天不可也自軫十二度至氐

四度則知爲壽星自氐五度至尾九度則知爲大火而其餘莫不皆然是考纏度非渾天不可也秦火之後其法蕩然漢洛下閎始經營之鮮於妄人又量度之至耿壽昌始鑄而爲之象轉而望之以知日月星辰之所在也唐李淳風因之而爲三重儀其在外曰六合其內曰三辰其最內曰四游而一行復益之以黃道儀焉其爲論亦密矣靖康之亂儀象歸於金元人襲之而規環不協難復施用於是郭守敬乃創爲簡儀仰儀及諸儀表其說以爲昔人以管窺天宿度餘分未得其的乃用二線推測於餘分纖微皆有可考又當時四方測景之所

凡二十有七東極高麗西極滇池南踰朱厓北盡鐵勒
古人所未爲者其法具載元史而儀表至今用之豈天
啓中國文明之治而預生是人以創爲一代之器乎雖
然觀象緯而審機祥者其小也星官曆家之事也因機
祥而脩德政者其大也有天下國家之責也方今聖
天子建中和之極臻位育之盛天地合其德日月合其
明星辰合其軌矣然而幹旋天機贊理化軸之道在
聖心固有望而未至者而愚獨可以無芹曝之獻乎是
故德有未純謫見於天日爲之食於是大采朝日以昭
其德刑有未當謫見於天月爲之食於是少采夕月以

虔其刑仁有未育木星乖次於是生殖象春以施其恩
禮有未節火星乖次於是長養象夏以嘉其會義有未
正金星乖次於是嚴肅象秋以果其行知有未周水星
乖次於是潛藏象冬以藏其用信有未孚土星乖次於
是法四時之均齊七政之常以貞其令殆見天不愛道
地不愛寶日月重華風雨時若皇極建而太微明相道
得而三台麗諫諍開而執法顯刑罰清而貫索空角以
應將帥之良胃以應倉廩之實少微以應遺逸之求
元以應黎獻之共室以應營造之省斗以應禮樂之彰
五星聚奎以應文運之昌五星聚斗以應武功之兢則

求端於天而奉若其道不徒責之石申甘巫之術而已
故愚嘗爲之言曰以天觀天天而已以人觀天心而已
天之宇非大心之宇非小堯有曆象四時所由定而不
知堯之心自具一曆象也舜有璣衡七政所由齊而不
知舜之心自具一璣衡也觀天而觀之以心觀心而觀
之以堯舜之心斯其爲善觀天者矣

博物

嘉靖壬戌會試

問博物洽聞儒者格致之學也昔人謂大人之胸懷
非一才高智大故於百家之言無所不包則遊神
玄覽信君子所貴也試舉數事與諸生折之春秋
之世列國多良大夫有著牧民山高乘馬輕重九
府之篇有讀三墳五典八索九丘之書可得而陳
之歟有因出使隣國而識實沈臺駘之崇有因龍
見絳郊而爲畜龍御龍之說又可得而縷指歟孔
子大聖人也黨人稱之爲博學太宰訝之爲多能
夫六經所刪述炳如日星天下誦習而講劇之無
論已然嘗解商羊之舞剖萍實之微悟羶羊之秘
決陳人庭隼之疑對越人執骨之問夫此五者非
耳目所濡深何以能旁通之若是也豈天縱聰明
之書者自無所不知歟抑亦有所考歟至漢人雖
誦法孔子其智識之相越何啻百倍然亦有辨騶
牙之出者有達重常之奇者有究貳負之詭者有
別豹鼠之異者漢以後又有能察劍氣者有能曉
角端者數子之見亦通朗矣不識與孔子之多能
可庶幾否歟孔門稱好學而傳博文之教者顏子

一人而已今考其遺書曰潛心曰如愚而所博之學不少槩見豈孔子有所隱而不盡傳之歟或資雖近道而學不博綜將出春秋數子之下卽漢晉人亦弗若歟抑其所博者自有在也諸生疆學待問有年矣願以前所詢者攄蘊以對

夫物燦然示人文矣故周物者存乎智夫道渾然示人精矣故會道者存乎心文者道之寓也精者物之本也文有不周則心爲有外無以盡散殊之用精有不會則智爲徇物無以達貫通之原是故物以道觀智以心運文以精貫用以原該君子所以究性命之精綜庶類之紀窮幽深之故而極古今之變也有由矣執事以格物之學下詢蓋欲觀諸生博聞辨智何如也未學固陋請

以謏聞效之可乎夫君子之學求以致道也而亦貴於博物者何也吾嘗遡觀道始而知物之原矣形氣未分太極旣立二儀肇判萬化斯彰道爲物主而主者不可測也物由道生而生者不可窮也依形附氣象聲肖貌翹翹蠕蠕巍偉譎異大荒絕域昆蟲草木之曠徃古來今寒暑日月之運夏革不能陳其端齊諧不能志其幻九牧之金不能備其狀隸首之算不能紀其數夫人處天地之中賦萬形之一自非精心內照通志外周安能枚舉而縷析之哉嘗觀春秋之世列國之大夫類多閑深辨博貫淹古今著牧民山高乘馬輕重九府之篇則

有若管敬仲焉讀三墳五典八索九丘之書則有若左史倚相焉聘晉而識實沈臺駘之崇非子產乎龍見而爲御龍參龍之說非蔡墨乎夫管子之書遷史善其詳矣謹政通商均役盡利一匡之業由此其選也粹羽純玉殆有得於聚意者歟倚相之博楚國以爲望焉章華肆侈申公進規祈招之詩由此其誦也式玉式金殆善陳夫王度者歟原參商之構郤而謂疾非由崇僑也知鬼神之狀矣辨董劉之世掌而謂非龍寔智墨也達人官之能矣數子者豈徒以才知之美而遂能博通若此哉夷考其時周典未亡皇覽具在伯益之所紀述外史

之所掌達名山秘藏金版玉箱之錄神經怪謀紫臺丹洞之簡與夫治國肥家之術刺世誠俗之言備矣賢者學其大不賢者學其小譬之入都多奇觀入市見異貨總攬而兼蓄之燁然著赫稱於當時流景曜於後代宜也迨秦火旣燔漢籍未著經生學士專門師授斷編殘簡猶不得其全而猶冥覽詭竒極命庶物斯已難矣然亦有若東方朔辨騶牙之瑞董仲舒達重常之鳥終軍別豹文之鼷鼠劉向究䟽屬之貳負類能察象於耳目之外定名於疆域之表動色縉紳震悚觀聽一何偉耶夫下幃發憤潛心大業者篤矣文史三冬萬言足用其

自表非誇也條奏秘書博綜羣籍者至矣幼學能文異材召見其自負不羣也矧去古伊邇遺文稍稍復出庸心考察者無頑鄙之訾深知道術者無淺闇之毀卽春秋諸大夫奚讓哉嗣是若雷煥察斗牛之氣而知豐城之二劍楚材辨角端之異而明天道之不殺窺豹見其一斑嘗鼎臠其寸鬻亦有足多者執事謂之通朗信乎嗟夫埴鼃不足以語海局於量也夏虫不可以語冰局於時也不博覽則不聞古今不見事類不知然否與埴鼃夏虫又何擇焉故鄒衍旁通五德侈談裨海遂使梁惠郊迎燕昭擁筴彼核監之不知其官貂蟬之不諳

其義問之則有餘恧矣博物之學固君子所不廢哉古今所稱大聖人者莫孔子若也使博物而可廢也吾意孔子當存而不論論而不議矣迺今觀之楚江拾果析以萍實季井得犬繹以墳羊鳥舞齊也推恒雨之徵隼止陳也闡楛矢之遺而專車之骨又楛爲防風所遺焉探賸索隱鈎深致遠總統百家包羅萬代非特漢晉諸人莫能窺其畔岸卽春秋數子亦未足涉其津涯豈誠資於好問而得於敏求者哉備天地之美稱神明之容內聖外王六通四辟天下之道咸該昭曠之原而通濬哲之鑿是故江海絡於地維寶藏富焉非取足於川瀆

也日月麗乎天經萬象呈焉非有待於燭火也聖人天聰明之盡萬理涵焉非有俟於問學也所謂大人之胸懷非一才高智大無所不包者非孔子孰能當之雖然太宰訝其多能則以不試自解黨人稱其博學則以執御自居又若不欲以是爲訓者當時及門之士若子貢之達冉有之藝夫子每不滿焉其所亟許而樂予之者顏子一人而已夫顏子博文竭力所見卓爾聞一知十穎悟如賜且遜避以爲不及顧以如愚稱而不以博辨自見也觀其言曰我不能博五經又不能博衆事守信一學不如廣觀無溫故知新之明而有守愚不覽之闇

嗚呼潛心退省入聖室矣造於眇思極窅窅之深矣黜聰坐忘無待於外矣今夫託契鴻濛而聆鈞天之樂者不審夫笙鏞祝敔之聲游精罔象而獲赤水之珠者不屑夫璵璠玫瑰之產顏子何嘗不博也而特不以博辨稱故夫子謂之曰吾服汝忘也汝之服於我亦忘也是博約之要授受之微也謂其才智出春秋漢晉諸子之下可乎蓋諸子者以智觀物周其燦然之文顏子者以心求道會其渾然之精孔子則兼道器貫本末小大精粗無乎不運其明是故守一方之術拘耳目之近而無弘暢閑雅之識是面墻之陋也離堅合異汎游廣涉聞

見雖殫原本則闕是多岐之惑也之二者失道均矣學者與其驚於外也寧殉於內何則空器在厨金銀塗之其中無物饑人不顧餽膳甘醢土釜所式入者嚮之其所取者有在也夫道管於心該於物辨析既精大原斯會所貴乎學者豈徒在物耶昔人有言心如丸卵為體內藏眸子如豆為身光明蓋見道器之樞具於我矣誠能周其粲然者於目而會其渾然者於心則顏氏之博文約禮殆庶幾乎愚不敏竊有志希聖之學焉敢以是復

北虜南倭

嘉靖壬戌會試

問古今言學者必貴用世嘗覽載記蘇秦起閭巷說

六國指其國中阨塞虛實如指掌賈誼自洛陽見

漢文言諸侯強盛當割後皆如誼言韓信自追所

還勸高祖入關取三秦弱項羽卒用信策夫蘇君

說客賈生少年韓淮陰武夫固儒者弗道而其言

皆售豈其於天下大勢將有可言者歟今在北邊

東有薊鎮西有宣大二鎮此三鎮最急昔宣大督

臣屢議設垣墻塹堡之險今可據以拒虜歟又有

欲大城京後者亦可行歟經畧薊鎮者以為先

拊循三衛內服而後可外禦然歟又有謂薊鎮邊

獨長而古北諸口最要備寡則力弱防弛則勢殆

欲多設兵屯可歟曩倭夷實首難浙直間通歲幸

漸休息而又千里被水患民無寧居茲寇轉而之

閩廣急矣頃江右尤急有司日以警聞此何以又

安之歟夫武備日弛而寇患克斥非練兵不可濟

茲可舉而行之否歟上明聖詔肯嘗切責諸臣

當事者宜訓練有序矣而未臻厥效何歟或言南

北勢殊所為練者不同然歟或又言北當責將帥

而南當責守令果若是異歟又別有究極根本之論歟在古聖世未嘗無蠻夷寇賊之患貴制禦有道耳其陳之毋忽

對執事策諸生而欲求濟世之畧經國之儒也故以時務終焉今時之務在西北則患虜宜大薊鎮最急在東南則患寇首南浙直轉入閩廣頃且薄江右矣古稱極治莫過唐虞而猾夏之防奸宄之慮猶自不免庸何損於聖世乎第今之建議者不審其要而煩言以飾聽圖事者不核其實而虛文以飾觀則嘗竊疑之矣何謂要南北之練兵是也何謂實知練兵要矣力去其弊而嚴責其成是也夫薊鎮宣大密邇畿輔頻年數數告警

疆幕內逼疆事日增武備寢弛戎行半耗卽隸於藉者率多選悞無復勇悍沉鷲漁陽突騎之風乃鍛甲砥劍矯箭累弦未能創敵而未見休時故曰最急也往者督臣議設垣墻墩堡議大城京後將重險而預防一勞而永逸也因以復大寧之戍莫開平之都警諸夷之心息四郊之燧其見卓矣然而塹山堙谷嫌以絕地畫境分圻能無棄野異日者叩垣登陴恐貽與共之戚矣矧物力方虛間左復發豈節民之道耶又儒臣議於幽冀之域土著之民一切賦役咸與蠲貸惟飼馬而供稅列屯而置隧也因以固疆圉之守施寬假之恩張制禦之

威成拱翼之勢其見遠矣然而藉民爲兵近於保甲月
操歲閱能不妨時異日者揭竿挺鋤恐貽腹心之患矣
矧公計方殷輸將悉罷豈裕國之謨耶是故兩議者皆
非要也夫宣大急矣猶爲外戶也若薊鎮則堂奧也東
起山海西抵居庸延袤幾二千里而近膺筦鑰之司者
懷震驚之慮胡可不審其要哉遠徵延固近檄宣遼在
我仰給於客兵在彼實疲於遠戍戎心游啓滋蔓難圖
于役靡遑及瓜莫代甲冑苦於蟣虱杼柚竭於轉輸非
久遠之畫也經畧之臣謂宜先拊循三衛伺彼虛實絕
彼鄉導以夷攻夷至善策也夫拊循者惠也而懾服之
者威也威振矣而惠施焉而後弗敢玩也所以振其威
者惟練兵之爲要乎至於東南之事亦有然者蓋倭夷
竊釁海島乘軍吏之弗戒潛竄浙直間羣不逞之徒投
機煽構閩廣江右之交多阨塞之墟萑符之數入焉嘯
聚出焉剽劫如退颶如突豕隨樸而輒起少熄而復熾
州縣或窘於城守之未備村堡多潰於壁野之未堅亦
旣急矣當事者戒心於擊目之危而困智於徒手之搏
於是議調遣議召募槍攘紛紜莫知所出今劇寇固在
也重以千里被水患徃徃赤子爲錫蛇而作使爲徂詐
剿捕之期胡可緩也問其所以剿捕之者匪調卽募耳

豈其廢郡縣之兵而乏鄉鄙之民耶西漢時郡國有材
官騎士太守都尉令長丞尉會都試課殿最水處爲樓
船邊郡行障塞有司以羽檄徵發各因其地此郡縣之
兵之實也彼役於官而食於民見謂爲兵者非少也胡
不以漢制律之也唐李抱真守懷州通籍人戶三丁擇
一給以弓矢曹偶習射歲終大校第能否示賞責二年
皆爲精兵此鄉鄙之民爲兵之效也彼民猶夫故也胡
不以抱真之法施之也夫寇始發而調且募也猶可委
也今數載於茲矣三年爲國遂使知方七年教民可俾
卽戎賢聖所作爲可不深思而勉効之乎應調之兵非

我族類惟思于賞而蹈利應募之兵率多無藉豈能安
制而矜節縱橫睥睨僵良善以爲已功稍逆其意則羣
起噪呼比遣之歸則四分鹵掠視薊鎮調兵之害爲尤
甚矣乃泄泄焉玩志於蓄艾之圖託言於采薇之役獨
何心哉是故南北勢殊而練兵爲要一也愚跼伏草野
竊聞 聖天子明燭萬里而心周乎四海屢屢 詔旨
切責督撫諸臣念此至熟也諸臣圖方畧奉奔走而厥
效未覩毋乃去弊而責成者不核其實耶夫練兵於北
將帥事也練兵於南守令事也制之以督撫監之以憲
臣請 上之賞罰而鼓舞其下之心志者也自練兵之

議行以殊能顯績而蒙不次之賞以無能僨事而加不測之罰者誰耶有之而弗能辨愚也匿焉而弗以聞罔也其咎有攸歸矣古者推轂闔外則闔外之事聽其便宜今之待將帥者輕矣有投石超距之士而無以優之有鞭扶貫耳之法而不敢施之奈何欲結其心而作其氣也古者保障一方則一方之賦聽其出入今之待守令者輕矣有父兄子弟之懷而無以恤之有身臂指使之勢而無以制之奈何欲習其教而遂其志也夫使將帥守令而不可任也則是不擇而用之者之過也旣擇其可用之才而恡其得爲之具所謂繫騏驥之足縛孟

賁之手者也是故賞罰嚴於上事權重於下而後核實之令可行也夫核實者練兵之要也其在於北調兵漸掣不必言矣而主兵之練也必稽影射革占役禁挑選復逋逃務期克伍而足用焉若邊墻工役卒歲勤勞文吏詰查經時漁擾生計朘於公費口食縮於私求凡此致弊之端實去之可也其在於南官兵宜訓不必言矣而鄉兵之練也必覈里甲明部隊招逃匿時巡行務俾適均而各守焉若繫名公府遂煩應役委權胥史緣以爲奸農業廢於菟田家殖棄於調遣凡此致弊之端實去之可也夫北地禦虜火器最捷而東南制寇短兵爲

宜武經載火攻之篇光弼創礮飛之制鼂錯條服習之
利唐宗耀劔舞之長皆核實以濟用者也今將帥亦知
火器之捷也每當視閱傭工以應已而置之矣守令演
武莫不肅隊而趨持矛而舞佯呼羣閱若將爲娛者曾
何裨於用哉是故實心以練則其技方精而其用可濟
也雖然猶未也執事欲聞究極根本之論愚也竊請遂
畢其說可乎薊鎮練兵之未效也諸臣憚於振厲而樂
於因循倚客兵以充扞禦薄主兵以供役使其心固日
夜跂徙官而釋負也東南財賦地也軍興費鉅匪調募
無以逞乾沒之能而盈谿壑之欲也嗟乎不實心以體

國而私便其身圖將何所利賴耶 主上神聖向者罪

邊帥之不武 天威也 遣部臣給餉於北而下 詔

減稅於東南 天恩也此忠臣志士所爲銳意殫力捐

軀報國之秋也夫薊鎮有備則延固宣遼兵可無調西
北以寧而東南經理得宜天下皆盡無虞矣是故因機

以應變量地以制宜當事者之責也戰國時蘇秦說六
國漢韓信計三秦賈誼料諸侯至其言卒驗若持左券
而取質也執事慨迂儒不達時宜而姑引此三人者發
其端固以俊傑望諸生諸生章句豎子耳何足以辱明
問聊述所聞備採擇焉

其說固以爲... 而况其... 固當... 其言平... 其言平... 其言平...

人物 豪傑

嘉靖乙丑會試

問局曲之士難與立功利巧之人難與任事自古... 甚可疑者如周公佐周不免東征之舉孔子相魯... 不敢議後代乃有天下甫定而即爲治未央者有... 幸君討逆而先試以左右袒者有身處僞朝至與... 嬖倖博陸者有叛卒投虜報至弗答且以爲吾固... 遣之者夫數子者皆當時所謂豪傑也而所爲若... 是初盖有疑之者焉然卒以濟事而天下賴之豈... 倖成歟抑豪傑所見自有異乎人者歟傳云非常... 之原黎民懼焉及臻厥成天下晏如也夫臻厥成... 焉固可自表著矣不知黎民懼焉之際果何以用... 之歟且未用之先靡所嘗試或有假之者焉抑何... 以辨歟夫今茲之舉誠願得豪傑爲世用也諸士... 無有因而自見者乎其各以意對無徒說爲也

夫豪傑之士所以能成天下之務者以心爲主以才爲

用而無與乎形迹之間者也豪傑何心也忠可貫金石
誠可質神明大罔弗容虛罔弗受無欲而恒清無著而
恒平斯豪傑之心也其才何才也明足以察治忽之幾
斷足以剖糾結之惑強足以勝艱大之任權足以酌變
通之宜密足以藏機敏足以應卒斯豪傑之才也若夫
人有所爲者吾弗敢違人未有所爲者吾弗敢起言欲
人皆聞也而使不吾疑事欲人皆見也而使不吾議名
之所繫則周旋而不含嫌之所在則遠避而不居斯世
所謂形迹者也嗟乎事各有迹亦各有情使情之於迹
若符節之相合則事可直行心得徑遂夫人而能之矣

奚侯豪傑爲也惟夫正變同塗翕張殊用或類之而非
或不類而是或逆而實順或益而實損或就之而適以
背或避之而適以招猶之至長反短至短反長其理難
以執也吾得其是而人謂非吾得其可而人謂否語之
則機露而僨事不以語之則事秘而叢疑有可見有弗
可見其意難以明也先合後違則有譽而無成就與先
違後合有成而無譽事起後救則人有其功已有其患
孰與使事不起則無其患寧無其功或爲之而不以爲
或不爲而乃以爲作事在此取效在彼有旣事而始可
知者焉有當時不知後世乃知者焉有終古而卒無有

知之者焉其實難以究也若此者可爲常人言乎豈惟
常人雖有其心苟無其才則亦無以破拘攣之見必且
膠固而不移雖有其才苟無其心則亦無以黜顧忌之
私必且遷就而無定故必心以主才不役於才才以從
心克副其心然後可以時羸時縮隨隨隨伸歷百折而
不回濟萬變而不匱者也若昔周公聖人也其相成王
制禮樂所可知者乃管蔡懿親也而東征之舉曾不少
貸此豈人之所能爲亦豈所肯爲者而周公則爲之孔
子聖人也其攝相事強公弱私所可知者也乃少正卯
聞人也而兩觀之事曾不後時此豈人之所能爲亦豈

所肯爲者而孔子則爲之蓋大義攸重無寧滅親大僞
是除無寧拂衆安有所圖於國故不計其身之危化有
所要於終故不恤其始之謗此大聖之作爲真萬世之
師表也而後代諸賢如何如勃如傑如瑋又何足以辱
明問哉雖然事變無窮而周孔不常有如必周孔而後
可將天下之事終無濟乎則四子者固亦一時之傑胡
可少也請各爲之明其意炎祚肇興鄴侯佐命非與民
休息時歟乃卽爲之治未央極其壯麗非無說也夫帝
居所必建也若草創於今必且改拓於後若田賦既定
而取以爲用必且賈怨于民况自我爲則用半而功倍

自後人爲則用倍而功半故當財無定主之時而爲一勞永佚之舉是百世之利也而誰則識之諸呂事露太尉率軍討之非明義正法時歟乃先試以袒而後舉事非無說也夫諸軍通呂久矣事露且皆自懼而吾乃與之舉事則或有他虞故特開以左袒之路使皆以爲劉之迹自見吾於是遂因其迹而信之而其心當自安蓋不惟誅呂可以濟事而反側亦已帖然矣是戢亂之智也而誰則識之狄仁傑爲相時二張亂政宜有以制之矣乃非惟無以制也而至與之博陸者豈無除惡之志歟意固以爲幾未協也幾未協而遽動殆也有謀人之

心而使之知拙也是故不虞其人而亦使之不虞乎我迨唐社旣還僞僭無據而庶下之事付諸張桓等矣是其弗制乃所以制也曹瑋鎮秦州時叛卒數十投虜中宜有以處之矣乃非惟無以處也報至弗答且以爲吾固遣之者豈無討賊之義歟意固以爲彼方未合也使

我疑則彼信是堅其合也使我信則彼疑是假手也是故以疑爲信而使之以信爲疑暨偵卒歸報虜果盡殄其人而邊境迄無事是其弗處乃所以處也若此者皆其有確然自信之衷有超然獨運之畧見本而知末故計出必審覩指而識歸故機發必中名不必有諸已斯

能就天下之實樂不必享諸已斯能祛天下之憂是故以費爲省以竒爲正以禍爲福以敗爲功當時籍其休而不見後世受其庇而不知者也傳曰有非常之人然後有非常之事有非常之事然後有非常之功又曰非常之原黎民懼焉及臻厥成天下晏如也茲四子者豈不亦近之乎向使其循襲故常假託標表徒較計於形迹之末則吾據其易而以難遺於君吾潔其躬而以患貽於國固非志士之所忍爲貞臣之所屑就者也雖然形迹固非豪傑之事天下亦不可以形迹論之夫盜者多富而富者未必盜庶者多貧而貧者未必庶是故降

不可假而章子以降勝秦則取其勝秦可也誕不可爲而弦高以誕存鄭則取其存鄭可也如不察其深而徒執其淺不要諸後而遽斷於初洗垢索其癥痕吹毛求其疵類則雖謂何導侈可也謂勃觀望可也謂傑依阿可也謂瑋縱寇可也計方立而已奪其成事未集而先與其敗心於何白才於何施雖在四子且不能自免于國事奚賴焉豈惟四子向使流言方熾而公旦遽棄於周麇裘且謚而尼父遂擯於魯則雖大聖亦束手遜避之不暇而赤烏碩膚之歌衮衣章甫之誦亦惡得而有之蓋昔樂羊爲將謗書盈篋而文侯不行故有中山之

功管仲賤辱俘囚耳鮑叔知而薦之卒定霸齊之業是
 故才哲之在世也上焉知其入則必任之而不貳否則
 智者謀之愚者得而亂之賢者為之不肖者得而隳之
 智者決策於愚人賢士程行於不肖欲收其効弗可得
 也下焉知其入則必相助以圖終否則無功不得民既
 以無功不得民議之有功得民又以有功得民議之未
 傳而先咻方樹而已拔欲收其効弗可得也然則豪傑
 之士所以能成天下之務也者豈非天下亦有以成之
 而然哉雖然豪傑亦難言矣孔子曰惡莠之亂苗也惡
 鄭聲之亂雅樂也若乃不疾而呻無感而嘅譏時好訐

不務成事可謂忠歟內藏險側外示洵直徵以小信行
 其大詐可謂誠歟廋惡畜奸務為兼納以相比周可謂
 大歟道聽塗說罔所決擇可謂虛歟惡衣朴躬不受簞
 豆言不以為邀名語不以為激利可謂無欲歟梯突脂
 韋務持兩端莫肯先事可謂無著歟勦襲往跡虛論高
 議矜飾慧辯不當事情可謂明歟寡謀好決不設叅伍
 強所不知違眾獨是可謂斷歟無遜以為勇不顧以為
 敢構隙長爭以為効力可謂強歟舞智拂經任術棄法
 可謂權歟峻設城府隱情匿端莫可方物可謂密歟戇
 而寡思喜動銳進不計失得以國事為嘗可謂敏歟儂

訶滑澤翻覆閃倏出入異言進退為巧越法禁以為通裂行檢以為達可謂不狗形迹歟故豪傑上也非豪傑而安志守舊中也用其才於不善下也不善矣而托之乎善假豪傑之似以眩時俗亂名實下之下也而下之下者恒取類乎上是故不可弗辨也人有得燕石者藏以為玉或告之曰此燕石非玉也棄之他日見玉則以為燕石也有聞鬻璞者慕以為璞或告之曰彼朴非璞也已之他日聞鬻璞則以為朴也何者似故也故良工之目不可欺以玉石良賈之耳不可亂以朴璞匪耳目也神識在心獨見獨聞難以語人者也斯又傑之傑也

經權

嘉靖乙丑會試

問孔子云可與共學未可與適道可與適道未可與立可與立未可與權則是權者聖人之事而學聖人者所當知也自今言之權固一物也而以之言道何取義歟且聖人直言權耳後儒乃以經權並稱果一事歟抑二事歟彼反經合道之說其謬固不足辯獨謂常則守經而變則行權然歟否歟夫權以達變固也至於居常之時其人倫物理雖至纖細莫不各有當然不易之則然所以各當其則而無過不及之差者果孰使之然歟且善用權者莫若孔子今觀其動靜語默孰孰非權者果何分於常變歟程子謂權即是經是矣而朱子則云經權亦當有辨果孰為定論歟乃世又有所謂權謀權術者其為害甚大亦可謂之權歟夫權信難言然聖人之權既所當求非聖人之權又所當擇則不可以無言也諸生誦法孔子或有得其說者焉其明著於篇用觀所見

學聖人者必知其道之所在而求以至焉可也譬則射

然儀的在前躍如而有見也於是運其巧力則有能中者矣苟儀的之不知而漫焉以射則用力愈多而去儀的也愈遠苟知之而力弗至猶弗知也夫學亦有儀的焉孔子云可與共學未可與適道可與適道未可與立可與立未可與權夫權也者圓而通者也是聖人之事而學之儀的也聖人圓而學聖人者以方始而方可也終而愈方焉則遂失其圓也聖人通而學聖人者以一隅始而一隅可也終而止一隅焉則遂失其通也夫學不至於聖人非成也不能權非聖人也非圓非通不可以與權也而不知所以求不求所以至非學也請先言

權之義夫權者何也稱錘也稱之爲物有衡有權衡也者爲銖爲兩爲斤爲鈞爲石其體無弗具也然不能自爲用也權也者銖則爲之銖兩則爲之兩斤則爲之斤鈞則爲之鈞石則爲之石往來取中至於千億而不窮其用無弗周也然必有衡而後可用也故謂衡卽是權權卽是衡不可也然使衡離於權權離於衡亦不可也蓋衡以權爲用權非用於衡無所用之分之則二物而合之則一事也故有言衡而不言權焉如曰律度量衡是也然而權在其中也有言權而不言衡者焉如曰權然後知輕重是也然而衡在其中也何者二物而一事

者也夫權也者既以輕重言則是無常變無巨微而無不爲之低昂者也非謂不得已始用之而得已可不用也一時無權必不得其正也非謂鈞石始用之而銖兩可不用也一物無權必不得其正也斯權之義也知權則知聖人矣夫聖人之所以用權者何也試觀之易夫奇之爲陽偶之爲陰陽以健施陰以順受人所知也然陽或變而之陰陰或化而之陽剛或摧而爲柔柔或往而從剛其理不可定也是故事以位異則易事以當位法以時遷則更法以趨時故曰變動不居周流六虛不可爲典要惟變所適聖人以此神明其德定天下之吉

凶而成天下之亹亹者也故曰巽以行權奈何後儒之不達也於是有反經合道之說夫物各有則經之謂也稱物而使當其則權之謂也聖人言權不言經非遺之也言權而經在其中也聖人以權行經而漢儒以權反經其謬無足辯也獨謂處常則守經遇變則行權而其說至今因之信斯言也是經權之異用也故程子曰權卽是經自漢以來無人識權字雖然經也者立本者也猶之衡也權也者趨時者也經以權爲用權非用於經無所用之者也故謂權不離經也則可而曰權卽是經是曰權卽是衡也此朱子所以又有經權亦當有辯之

說也但猶謂權爲處變之物故引孟子嫂溺援之以手爲證夫嫂溺援之以手權之易見者故直謂之權也若夫男女受授不親禮也而亦非離權也何則人之受授未有不親者也而獨男女則不親焉何也嫌也不嫌則授受親嫌則受授不親非權而何是禮之正者亦由權而正也而曰權而得中是爲禮也是徒以權之得中者爲禮而不以禮之得中者爲權乃似又猶有遺說也故程則言其一事然而非一物也朱則言其二物然而非二事也以盡其義合二子而後可者也斯義不明而世之言權者大抵皆稱古人不得已之事如舜不告而娶

之類夫不得已而爲之處者易見者也權固也然而天下之事豈皆不得已而後爲處者乎其日用彝倫之際雖至纖至細莫不各有當然不易之則使非權以稱之果能各中其則而無太過不及之差乎否也則安可謂變則用權而常則可不用也且權之說出諸孔子請卽以孔子論其墮三都誅侏儒權也處其變固也若夫可仕而仕可止而止可久而久而久可速而速非權乎不然將無有可仕而止可久而速者乎此猶其大者也若夫入而鞠躬出而與與上而閭閻下而侃侃非權乎不然將無有當鞠躬而與與當與與而侃侃者乎此猶可指言

者也其曰無意無必無可無不可從心所欲不踰矩則無時無處無非權也是日用而飲食者也由是觀之權之爲用常耶變耶無不有者耶固可得而識也而世之君子徒曰權者濟一時之急非悠久之用居常無事則置諸空虛之地遂使聖人大中至正之極旁行順應之方虛靈洞達之機精邃淵微之旨晦塞不明於是大道隱曲學與膠柱一偏之說守株一節之行東嚮望不見西墻南嚮望不見北方而不知其合之圓也從箕子者以比干爲愚從伯夷者以下惠爲褻而不知其會之通也雖稱有道術者亦不過下守局士之軌非不爲貞然

不免於諒也非不爲禮爲義然不免於非禮之禮非義之義也差之毫釐謬以千里差之千里謬以無算而大入之事不復見於天下矣雖然權可易言哉察之幽渺定之纖忽非至明弗能也爲一爲兩參伍錯綜非至辨弗能也觸幾而應倏彼倏此非至熟弗能也效越人游者殘其軀代大匠斲者傷其手是可與下學道乎然越人之游不可效也而遂謂世無越人不可也大匠之斲不可代也而遂謂世無大匠不可也適道難於學非謂學可不適道也立難於適道非謂適道可不立也權難於立非謂立可無權也夫學至於立可不謂有得歟然

而成心未化終有翳於鑑空圭角尚存終有礙於圓轉
明非先物何以制變於未形智不通方何以當機於猝
至以之行已則精義之用窒以之經世則彌綸之道乖
聖人之德業謂若是乎哉是故不可以無權也夫誠者
不勉而中不思而得從容中道聖人也權之至也誠之
者明善而誠身者也所以求爲聖人也明善貴乎虛心
心虛則理融理融則識達誠身在於克己己克則氣順
氣順則德弘求之以問學練之以事行會之以深思涵
之以積養查滓既融自圓自通繇是爲仁義之宰攝爲
禮樂之宗正無不可矣化不可爲始諸可爲神不可知

始諸可知惟所適者正而不已其功未有不幾者也雖
然權亦不同焉有用之於謀也者則爲權謀有用之於
術也者則爲權術彼其竊變通之似以濟其揣摩之私
而競逐於功利之間則能使天下多事故有惡於權也
雖然弓矢戈矛天下之利器也良民以之禦寇而奸民
以之爲寇苟徒以良民之禦寇也而遂縱於奸民可乎
苟徒以奸民之爲寇也而遂禁於良民可乎顧視所用
何如耳奸民之權旣任之而不知擇聖人之權又畏之
而不敢求是常使禦寇無具而爲寇有資也是故天下
鮮通儒而竊之者則肆矣孟子云所惡於智者爲其鑿

也如智者行其所無事則智亦大矣夫所惡於權者為其竊也如權者皆出乎所學之正則權亦大矣是則可與語權也已矣

錢鹽

嘉靖乙丑會試

問山澤之儲民生之利用存焉自太公立園法以權

百貨之中管仲煮東海以佐一匡之業而後世之

言鹽筴錢幣者宗之要以經制阜民通利上下法

之不可以已也漢唐而下其制益益密矣以言鹽

筴則有官給器而募民煮之法有官自貨而總其

利之法有召商入貨中引之法是孰為適宜歟以

言錢幣則有兩銖四銖八銖之異其品赤灰比輪

公式之異其名當五當十當千之異其用是孰為

折衷歟我朝參酌往古設鹽運司鹽課司以權

鹽筴設寶源局以鑄錢幣制易而不煩法信而可

守視歷代最稱善矣迺邇者淮離底滯邊餉告訕

制錢沮塞市闐生疑若是者何故說者謂工本之

鹽增則正課壅私鑄之錢盛則制寶淆其果然歟

停工本斷私鑄果可使泉貨阜通公私兼濟歟且

鑄錢利重而私鑄則其奸微故察之為難工本之

增度支專為足邊計也茲而損之將安所取盈歟

夫授握算而不知縱橫非適用之器也多士於茲

二者諒有成畫試為我陳之

經國之道莫先於慎法法者國與民之所同依也國依於法則令重而體尊民依於法則觀聽不惑有所恃以殖其業而鼓舞不倦甚矣法之不可以不慎也故立法者必慎爲經久之規而務在法之可常行法者必慎爲通變之權而務不失乎立法之意猶之持衡然鈞鎰銖兩截然不可以毫釐假也至其一低一昂一進一退趣物制平因變濟務則權之用歸焉耳今夫鹽筴之權也錢幣之興也先王所以阜國足民兼利上下之大經也唯操之而不得其權焉斯其弊有不可勝原者矣蓋利與義相爲出入者也經國者導利布民期於兼濟義莫大焉夫苟見小利而輒易軌焉求法之通行而無害不可得也則今日之鹽法是已利與害互爲輕重者也經國者導源塞隙守於畫一利莫大焉若見小害而輒自沮焉求法之必行而民信不可得也則今日之錢法是已愚嘗通覽古今之故錯綜利害之端而有以得致弊之原與夫揅弊之要矣且鹽筴何昉乎昉于管仲相齊伐菹薪煮海以啓富疆之基也嗣後元狩脩其術而禁權遂與古今相爲終始其烹煎之制給予之宜法禁之張弛公私之利弊代有變矣求其適時之宜大有禪司農之經費者吾唯取夫唐之募商給引宋之入粟實邊

之二法者焉錢幣何始乎始于太公佐周立九府圜法以通泉貨之用也迨于周景更其制而後世遂各因時之利病以爲興廢其名品之異制用之殊輕重之相懸真贗之相錯代有變矣求其折貨之衷雖時有廢興而不改者吾唯取夫漢五銖唐開元之二錢者焉夫自太公管仲而來上下數千年矣而法之可稱述者僅僅若此法之善誠難矣而持法者不可不慎察也我朝于產鹽之地設轉運司者六提舉司者七鹽課司各有定額行鹽各有分地而淮浙齊晉之課專給邊餉募商輸芻粟塞垣領引守支蓋倣唐宋之意而規制爲益善矣

然就各運司而論兩淮之課居其十七是以九邊之仰給尤重夫何邇年以來鹽務積滯邊廩告虛使二百年通濟之法一旦廢格牴牾交敝於中外是惡可不深求其故耶蓋鹽雖斯民無日可缺要不過食味之一耳管夷吾計口算賦逮于吾子苛矣然必有是口乃算是賦非漫加也異日者淮鹽額課不過七十萬引有奇已爾迨承平寢久而生齒繁于是每引以餘鹽副之蓋實計一百四十萬有奇矣正課遵舊制入粟關塞以實邊儲餘鹽權時宜入鈿運司以解內帑竈無贏積國有倍利法至善也頃歲額派之外復加以工本鹽三十五萬引

亦以餘鹽副之準 國初課額固已三倍之矣而羨鹽之割沒不與也夫行貨之地未嘗加闢食鹽之口豈能驟倍鹽驟增則壅而不售壅而不售二歲必有一歲積引矣行之十年則有五歲之積而引不勝滯矣引滯則商本虧本虧則不樂輸邊轉而營他利矣籌邊者以開中之無人也必下其估雖下其估而猶有不至焉此邊供之所以益詘也此上下俱困術也夫鹺司之給邊者凡四獨淮利稱饒故兩浙山東長蘆必兩淮帶派而後可通也淮鹽滯則此三方者均病矣是使 國家全不獲煮海利也然則工本之設增正課乎損正課乎其效

可覩矣而可不求所以通變之耶我 朝錢法自 聖

祖未建極之前卽創大中通寶混一之後又鑄洪武通

寶迨 成祖 宣宗 孝宗各鑄通寶而冠以年號焉

其制一準五銖開元之度與歷代制錢相兼行使令至便也私鑄之科處以極典而又懸發覺之賞格購之法

至嚴也是以利孔不分民聽不惑財貨流通而上下俱利矣夫何邇年以來擅巧者工趨利作奸者輕犯法盜

鑄雲興鉛錫殺雜幾于縋環鵝眼矣我 皇上赫然出

令悉索浮僞之弊而剗絕之鑄嘉靖通寶以復 祖宗

之舊典與天下更始使數十年沿習之陋廓然大清不啻

快矣迺真工大奸復擬而私鑄之紛紛然與制錢競流於都市此不可耐也昔漢令郡國鑄五銖錢吏民之坐盜鑄金者衆矣而不能半天下大抵皆鑄金錢矣後罷郡國鑄錢專其事上林三官而盜鑄遂尠以勢重而威行也今自寶源局而外造鑄者南京寶慶已爾環京師而邑者鎔冶之爐相望也此其無忌憚之尤也漢第五倫一督鑄錢椽耳領長安市而市遂無姦巧矧今法令詳密百司具職局有督視之長市有徼巡之吏而使僞錢不惟公行間閭且旁緣爲百司俸入焉而司課不察也此有司不能奉法之過也而非錢之不可鑄也因而

廢之是使盜鑄者操其柄而官爲作止也非所以任長利而杜深奸也而可不思所以振厲之乎是故興廢有道視時之屈伸而已取予有方視勢之向背而已羸縮有宜視機之緩急而已故今欲採鹽法之弊莫若復舊額去工本欲理錢法之弊莫若復公冶禁私鑄夫工本之爲鹽法害也有識固豫言之而人莫之省也今其敗端見矣所以隱忍而不除者以各邊歲例非此無以足其額也而不審其有虛額而無實惠也豈惟無之且並開中之額而失之矣其爲患不細也故無工本則引不壅引不壅則鹽利通矣利通則商不困商不困則樂於

報納矣商樂報納則芻粟叢赴而邊備饒矣時估不下
侵而倍有獲矣一舉而四利集焉歲例雖如數省之可
也必不可省則此工本之增無幾時也前此必有所以
給之者獨不可考其原乎此所謂不以小利貽大害也
先王錢幣之興將以利民而非以自利也然國計不給
則亦取贏焉當今經費廣而蓄積詘也康俗濟用將治
鑄有小補焉而何可廢也故莫若復公鑄復公鑄之法
在於銅美而工精使私鑄不能擬然其費鉅矣本息不
相權由無利也其要在於歛銅不下布宜令郡國俾民
得以銅贖罪有貨銅者官以罰鍰易之抵歲解額焉則

銅必上湊矣禁私鑄之法在於收僞錢蓋制錢之初興
也司市者不稽使僞錢得入焉民家有而戶用之非一
日矣卒然斷之則奪民之業而駭且怨彼豪黠者且日
蓄而伺禁之弛也宜令民以私錢首者除罪仍以官錢
一當三酬之其以車畜販載僞錢者沒其貨不宥則私
鑄無所售必可絕矣私鑄絕則公錢當益布此所謂不
以小害妨大利也嗟夫財用之在世猶水之在地中也
立法者濬其源者也行法者導其流者也水之所以得
其性也引而極之則源竭壅而激之則衡溢而奔放而
水之害大矣是故治水不可不慎也順其性而已矣制

法不可不慎也審其權而已矣權豈易言哉聖人所以
經物宜御人情之大端也是在司國計者審之而愚
生何足與知焉

樂律

隆慶丁卯應天

問序氣成物助流政教昭德象功樂之為用莫大焉
英莖之制美哉邈矣術家制尺較黍之類言近繁
瑣姑舉其大者評之宋儒有言寓器以聲當求之
聲而不當求之器者有言審音之難不在於聲而
在於律不在於宮而在於黃鍾者可指而言與黃
鍾之長九寸其說何所昉與其損益相生可得聞
與其果然與又有謂黃鍾為三寸九分者亦有所
本與其損益相生之論視黃鍾九寸者同與否與
其清濁之辨多少之數果孰為當與彼作為通解
鍾律律呂新書者其中亦有相發明者與在昔有
得牛鐸而知為黃鍾之宮得玉磬而識為黃鍾之
缺者豈以明盛之世而顧無神解其人乎此固
主司者所欲聞也

有作樂之本有作樂之具何謂本叅之造化發之性情
達之倫理驗之風俗以還隆古之盛治者是也何謂具

長短之辨多少之差清濁之判高下之節以求太音之
希聲者是也明於其本矣而不審於其具吾見音韻之
難諧也規度之未備也太和雖存何以成導和之用至
順雖協何以收達順之功哉世之論樂者往往究心於
中和之理致詳於神化之精而於鍾律諸家之說漫置
之不辨曰此噐數之小也此節目之微也聽其言非不
美矣大矣而實則不然夫金石不調后夔無以施其智
律呂不具師曠無所寄其聰故雖聖如仲尼賢如季札
使非樂聲之親接於耳何以學之而忘味聆之而審音
邪昔漢有制氏世掌樂官然但能紀其音律而不能言

其義君子固深惜之自漢以後通經學古之士類能因
文以求其義而音律之製載籍亡傳則知之者蓋鮮矣
是以爲論愈多爲法愈淆雖以和峴胡瑗司馬光范鎮
諸賢亦不能以相一也况其他乎古稱議禮之家名爲
聚訟彼議樂者何獨不然在宋徐復氏有言曰聖人寓
噐以聲不先求其聲而更求其噐其可用乎此言制律
當先審音也朱子曰審音之難不在於聲而在於律不
在於宮而在於黃鍾此言審音當先求諸黃鍾也世爲
黃鍾之說者曰置一而九三之以爲法實如法得長一
寸凡得九寸命曰黃鍾之宮各因而三之上生者益一

分下生者損一分自是朱子因之以爲清濁之辨曰五
聲之序宮最大而獨濁羽最細而獨清商之大次宮徵
之細次羽而角居四者之中見於通解鍾律者然也是
司馬遷之說也蔡氏因之以爲多少之辨曰黃鍾長九
寸空圍九分積八百一十分天地之數始於一終於十
其一三五七九爲陽九者陽之成也其二四六八十爲
陰十者陰之成也見於律呂新書者然也是亦司馬遷
之說也按戴記宮爲君商爲臣角爲民徵爲事羽爲物
而貴賤因以判焉信如朱子之言也則是濁者貴而清
者賤乎按易傳一生二二生四四生八八生六十四以

至於萬所謂太極也信如蔡氏之言也則是多者貴而
少者賤乎愚生於此蓋不能無疑矣且以黃鍾九寸上
下相生互爲損益者算之其增減之數少自二分多至
於四寸三分差池不齊夫律曆一道也曆家二十四氣
每氣算之不差毫釐若一氣短二分竒又一氣短三分
四分竒又一氣短五分六分竒又一氣短四寸三分竒
則月之大者過於三十月之小者不及二十九日不惟
無以成歲而律管候氣亦不可用矣况陽氣自冬至以
漸而升而律反減則氣有餘而管不足陽氣自夏至以
漸而降而律反增則氣不足而管有餘擬之數而不齊

求其說而不得於是。有半律子聲之議。出焉。委曲以相符變。遷以相就。其辨雖工。恐非造化自然之妙也。愚嘗求之諸書。於通鑑外紀。得劉恕之言焉。曰。黃帝命伶倫造律呂。自大夏之西。阮隃之陰。取竹於嶰溪之谷。斷兩節。間長三寸九分。而吹之。以爲黃鍾之宮。於隋志。得長孫無忌之言焉。曰。傳稱黃帝命伶倫斷竹。長三寸九分。而吹之。以爲黃鍾之宮。近世儒家。因取是說。以爲元聲。而以次推之。升陽漸益。至於蕤賓。得九寸。歸陽漸損。至於黃鍾。得三寸九分。所謂三分損益者。以左右對待言之。隔八相生者。以正徵言之。雖未必果有得於天地之

元聲。然其措意也。勤用心也。密矣。徒以異於先儒之說也。并劉恕長孫無忌之言。舉不之信焉。不知君子之論。惟其理而已。求之理。未必是也。雖言之出於聖賢。不敢以苟同也。求之理。未必非也。雖言之不出於聖賢。不敢以爲異也。今姑就劉恕長孫無忌所謂三寸九分者。算之。由黃鍾至大呂。增六分。由大呂至大簇。由大簇至夾鍾。由夾鍾至姑洗。由姑洗至仲呂。由仲呂至蕤賓。並增九分。由蕤賓至林鍾。減六分。由林鍾至夷則。由夷則至南呂。由南呂至無射。由無射至應鍾。由應鍾復至黃鍾。並減九分。蓋大呂當五陰之盛。一陽始生。則陽雖進而

尚弱林鍾當五陽之盛一陰始生則陽雖退而尚強固宜其增減僅得三分之二也驗之清濁焉則黃鍾極清者也大簇以下以漸而濁至蕤賓而極大呂次清者也夾鍾以下以漸而濁至林鍾而極極則以漸而清轉爲黃鍾斯不亦清者貴而濁者賤乎驗之多少焉則宮聲極清者也黃鍾爲正宮其數極少故爲君臣數多於君故商爲臣民數多於臣故角爲民事多於民故徵爲事物多於事故羽爲物不亦少者貴而多者賤乎是故通於清濁多少之辨明於貴賤尊卑之義而黃鍾之律可得而言矣然則司馬遷黃鍾九寸之說非乎曰九寸者

蓋黃鍾之終益之極而爲蕤賓之管也非愚之私言也九寸黃鍾之變韋昭嘗言之矣非特韋昭言之也司馬遷亦曰細若氣微若聲然聖人因神而存之雖妙必効是遷亦未敢自以爲神而必有待於聖也朱子亦曰古聲旣不可考姑存之以見聲之彷彿以俟後之知樂者是朱子亦未敢自以爲知而必有俟於後也今試取所謂九寸與所謂三寸九分者並試之築室布灰以俟其氣截竹爲管以求其聲而孰爲正也較之籥合以均其量實之柷黍以參其度而孰爲準也然後以之比歌聲以之齊簫聲以之定十六聲其是其非必當有相形而

不可掩者故程子曰律取黃鍾黃鍾之聲亦不難定世
有知音者舉上下聲考之自得其正真知言哉雖然所
謂作樂之本者是天地之元聲也作樂之具者是天地
之元數也元數者律呂長短損益之義雖難言也而夫
人固可能也元聲者乃黃鍾律呂之原雖易言也而非
聖人莫之能也記曰作者之謂聖述者之謂明今世古
制弗存明者則何述然而至樂之在天地間固不容以
一日息也竊意 聖明之世必將有后夔者出焉神解
於曠世之後以成鳳儀獸舞之化彼區區得牛鐸而知
爲黃鍾之宮得玉磬而識爲黃鍾之缺如荀勗張文收
者益不足言已書生之見管 蠲測蓄疑於中久矣謹
因明問而質之

時務

隆慶丁卯應天

問學者明體貴適用適用貴濟時諸士學成而待用者也如或用爾則何以哉今聖天子御極際中興之運執更化之權君子滿朝圖惟治理欲置民以安固有日不暇給者而議者猶以為民未安也豈法制之初令行未遍民未受其賜與何天災之不常而水火盜賊之數數見也司農告匱國用不克必取克於民乎且民何以自給也語曰開財源節財流莫民事為急也無乃冗食者耗之與富與教兩者不相離今時士風所尚有害於農者否與治民者吏也今之吏治亦既振飭乃其弊猶有存而未杜何者為最甚也夫政繁則民亂當必有易簡之道運於法制之外者茲於收人心弭天災足國儲脩兵政釐士習核吏治而使天下之民舉安願悉陳其實求其要歸以觀作用如何諸士其明以復我

愚竊聞更化者莫病於重懲乎既往而不虞其遺後來

之患安民者莫病於過與以厚望而不察其藏不測之憂夫所語更化者何也傳曰更化善治譬諸琴瑟不調必解而更張之蓋法未有歲久不弊者一旦掃除其舊而與之以新天下之民延頸望治何其幸也顧前人之法不皆不善而今之法未有甚過於前舊弊未祛新患叢生令有所不行民無時休息譬諸調琴瑟者鼓之成聲可使人聽而甕缶箏箏雜進並奏則聽之者不知其爲美而且惑矣夫琴瑟以易人之聽乃致人之惑法制以令人之喜乃失人之望此其患甚切而其憂益以長不可不察也且今天下號極治矣天子仁儉性成令

聞方昭公卿大夫百執事布列在位陳謀獻計者畢智之士也採議集事者竭忠之臣也愚生伏在南陬無所聽睹乃亦竊有聞方其詔令初下鄉人父老扶杖往聽感極而涕何異漢詔之下山東唐令之下河朔也思慕德化幸見今日莫不說喜何啻恒饑之子之食大旱之苗之雨也乃後則日異矣又後則月異矣夫人之情望之過而實不至則怨生焉今時之民未怨也其勢則然耳愚生之見以爲安民莫如慎事更化莫如救患今天下民貧矣饑寒切身十人而九流亡轉徙十地而五疾痛箠苦之狀啼號之聲不可聞且見也往者賦歛無

時費出不經奉行恐後士大夫扼腕而遊談者以爲非盡有司之過乃今則誰使之然也 詔許內供之 以減矣而浸漁之弊數倍也 詔許加派之令止矣而科擾之弊滋甚也江南財賦之窟久困徵輸江北河流之衝積苦汜濫日望官庾罄罄待哺未之至也一旦司農告匱持斧之使四出遠邇小民間者羣然嚙指而相視曰此何以爲也夫撫之則親親則安威之則懾懾則惑小民之常度也卽督償逋負諸路分部盡使職矣如必假之以權則天下之使在外秉憲者豈少耶官衆則出令者多權分則任事者鮮州郡趨承昏夜靡遑坊里供具

膏血盡竭傳曰鳥窮則啄獸窮則攫馬窮則佚此善喻也故民不可擾也民擾則不寧居不寧居則失其故業漢文帝時最號富庶乃進言者曰方今之務莫若使民務農而已夫農者天下之本也粢盛之所出財用之所殖禮義之所由生也今之時國無陳積家鮮蓋藏不逮漢遠甚農之所獲歲入幾何父母妻孥未飽惟正之供不給而乃以食無用之兵徃者東南用兵以爲官兵不足恃呼市人而集之軍未請行征坐享餼食兵連數省耗穀無算昔人謂一人終歲之食積之可以餉千軍語重穀也今寇患異昔矣此兵非定設也呼而聚者可麾

而散也集而多者可分而少也乃諸路老弱疲羸之卒安所用之奪農家之口而歲給不休非計也夫一人在官則一夫不耕耕之者寡則食之者益不給漢人嘗有游食之禁矣可踵而行也然非徒如此也今之游食之輩視昔黃冠異流殆甚矣教化不興浮議日作人思以售其詐少藉氣力交通貴人片言肆口禍言隨至乃其文繡被體膏粱厭腹不藉耕耘之入而有阡陌之富此風之競日增月益非細故小害也夫人心未有不慕富而苦貧者乃游食之輩富而民貧也亦未有不喜逸而厭勞者乃游食之輩逸而農勞也則農何以勸也不勸

農不能安民矣而又有健訟之習以壞其肢體而離其心則酷吏之爲也夫自古制爲官罰失檢於身者罰之輕流毒於民者罪之重蓋莫重於貪與酷兩者今時崇廉去貪奪其官且責之償貪吏亦稍稍懲艾矣而酷吏奮臂興曰不嚴刑不可以得名名之高利之厚也於是多以多訟爲利而健訟者乘之故一事而追求累歲一詞而連及數十百人如甯斯設如甯斯入何其忍也夫十人被逮則十家不寧百夫不耕矣百人被逮則百家不寧千夫不耕矣貪利民之入酷害民之耕貪破民之家酷戕民之命較度輕重酷之罪甚於貪也民焉得安而

又有以酷濟其貪者民又焉得安夫民天地所生非一日長育也國門萬里誰與控訴人將效尤害何底止以故上千天和陰陽謬鑿蓋聞都邑之境方春而霾入夏而旱淫雨無節禾黍一空至於漕渠之水禍遼左之火兆諸地告災累牘而至此皆民怨之所致也民猶水也橫流常以覆舟亦猶火也虐焰輒以自焚未有不安其生而能驅之用命暗之使默默不出口者也書曰怨豈在明不見是圖是故患在明者憂在近其憂小患在隱者憂在遠其憂大今天下之民非可以賤視而輕慮也饑寒者未忍於自斃流亡者未歸也頃聞中原嘯聚之

羣乘間竊發者有矣豐沛蕭瑒之區去地數百里安知無斬竿揭木之流者出乎東南之寇氛未盡滅西北之戎甲不得解釋今弗圖異日廟堂之經營殆十百此也愚竊憂之輕徭薄賦與民休息故催科之政宜緩也救災恤患與民更生故賑給之惠宜亟也農時不可失故勸課之令宜勤也兵貴精不貴多故坐食之衆宜簡也誣善之人其詞游故游言不可倡也失刑則刑失死則死故健吏可誅也夫此六政者愚生就執事問之所及而明其說小民欲言亦大都若此矣然其道主在行之以斷書曰惟克果斷記曰上人疑則百姓惑故疑者功

之廢也斷者謀之決也往代賢臣善謀善斷協心共政
無問彼已要在於成國是安民生爾今天下望治何亟
也顧令甫出而求勝其說者更進一議明日又一議無
少加損輒經旬月始播中外有司以為未定之論且行
且議而民乃惑也夫道旁作室三年不成路岐迴車千
里坐失今時之政何以異於此哉若夫在上之人一注
念于救民而執機要于其間天下固不難治也

經學

隆慶戊辰會試

問孔子刪遺經以垂訓明正學以淑人所以一道德
同風俗之大本也在昔成周小史外史之所掌司
徒樂正之所典經無異籍學無他岐周禮載之詳
甚可指而言歟坑焚之後諸書遞作百氏叢興甚
有稱緯以匹經援佛老以附儒者其謬妄舛錯無
論已即或以世所崇信者評之三代以上書散佚者
多矣乃或謂汲冢書為周書夏小正為夏書山墳
氣墳形墳為義農黃帝書何所據歟儒於道最高
而人之命儒也往往多妄兩漢書傳儒林唐書傳
儒學宋史別傳儒林於道學之後何所見歟夫周
夏之書與漢唐之儒此猶有易辯者乃三墳出五
典之上而序書獨斷自唐虞宋儒多號為聞道者
史顧別之於道學此又何以說也先正方氏嘗謂
辨書之法有三程子云今之學者有三弊其說可
得聞歟夫後世之書多偽而儒多不純固矣乃有
并疑聖經而訾正學者然則窮經論學將何所折
衷歟在稽古尚志者必有概於中也試究論之毋
畧

經以載道而後世之書多僞也則聖人之經紊矣學以致道而後世之儒多雜也則聖人之學病矣夫僞書者依先王模古昔闕肆新奇使人易信而善失真故曰紊經雜儒者引詭言持異說偏僻幽眇使人易溺而多害正故曰病學經不可使紊也是故惡夫僞也學不可使病也是故惡夫雜也若乃盡疑聖人之經而輕訾聖人之學則又豈知道者哉惟知道則可以齊世意指執士習尚明教化而同風俗矣今夫道者原於天地備於聖人經學之所從出也昔者聖人之作經也樞紐造化陶冶性情綱紀政事宣達中和扶植名分垂恒久之至教

洩神化之奧旨莫非道也其爲學也徹上下會精粗成終始該博約自致知格物至乎平天下一致也自灑掃應對至乎神化性命一貫也莫非道也道無二致故經無二教學無二術也自昔帝王樹風聲流顯號錫皇極而升大猷者曷嘗不表章經籍崇尚儒學乎考之成周小史掌邦國之志外史掌三皇五帝之書籍如此乎備也樂正以詩書禮樂造士司徒以德行道藝登賢教如此乎純也而異言有禁左道有誅防之如此乎嚴也故其黨庠術序之所傳布經生學士之所研究蓋終其身安而不遷焉是以國無異政家無殊俗人無枝言聖人

之經學燦然大明於天下噫何其盛也自秦人燔書坑儒使天下不睹聖人之遺籍不聞聖人之正指於是乎諸書遁作百氏叢興意義各殊軌轍益衆其甚者舍經而信讖緯之書去儒而從佛老之教聖人之道又何其厄也然讖緯之書以艱深隱澁之辭飾牽附鉤抉之術人固得以不經斥之如劉勰正緯之說是已佛老之教以謬悠荒僻之論隱虛無寂滅之旨人固得以異學闢之如韓愈原道之篇是已何者緯之於經不可以匹而佛老之於儒不可以混而一也則猶章章易辨者也乃天下固有僞而似真雜而似正使人惑於似是之迹而

忽於毫釐之差者則辨之甚難而不可以不辨也今夫姒氏平水土而巫步多禹扁鵲廬人也而醫多廬此讎僞而假真者也人有姓孔而謬字仲尼者服其服升其堂則仲尼也優孟學叔敖三日而見楚王王見之則叔敖也此名是而實非者也然則天下之僞書與所謂雜儒者視此奚異哉夫世傳汲冢書爲周書其言文武周公之際似矣然馘魔以億計則非仁人之師積穀以霸言則非王者之治其稱周書者僞也世傳夏小正爲夏書蓋取吾得夏時之言似矣然以爲令善則何以不如時解月令之全以爲書存則何以不列禹貢胤征之次

其稱夏書者僞也夫周夏之書猶後出也乃三墳書則左史所讀安國所稱宜爲有徵而足信者然太素太初之說則剽莊列之餘言園丘封策之文則摭周漢之規制蓋是書之亡已久而後世僞爲之者也觀序書斷自唐虞而不及三皇非明證耶兩漢傳儒林無慮數十蓋彬彬盛矣然授書而懷青紫之慕稽古而誇車馬之榮他可知也則聲利雜之也唐傳儒學不下兩漢蓋增增衆矣然南郊建議而諂女后春宮侍讀而黨叔文他可知也則巧佞雜之也夫漢唐之儒不必論也乃宋儒林傳所載則服膺聖言究心吾道宜皆淳粹而可宗者然

以金華之學而不免乎傷巧之議以永康之學而猶涉於粗豪之習則得其性之所近而不自知其雜者也觀宋史別傳儒林而不係之道學非定論耶由是言之經亡而後天下有僞書僞書出而經益亡矣學絕而後天下多雜儒雜儒出而學益絕矣此道術分合之幾理學存亡之自胡可忽也然天下固多信而溺焉者何也爲其似也夫佞屈似深淺俚似質譎詭似竒剿襲似據能使誇者炫其博而不知游滯汗漫之無歸誕者樂其異而不知隱顯幽遐之匪實則僞之所以亂真也局曲似忠信矯亢似廉潔汎濫似廣大清虛似高明能使惑者

任口耳而失精微辟者執意見而離道本則雜之所以害正也故君子任真以祛僞崇正以黜雜不令似是者得參乎其間則窮經有要而論學者有準矣正學方氏之言曰辨僞書之法有三味其辭以望其世之先後正其名以求其事之是非質諸道以索其旨之淺深而真僞無所眩矣茲其窮經不庶幾乎明道程子之言曰今之學者其弊有三或牽於訓詁或溺於詞章或流於異端惟知道者乃儒者之學也茲其論學不既當乎故由方氏之說則可以契勘諸書而不迷於聖經由程子之說則可以評隲諸儒而不謬於聖學尚奚僞與雜之患

哉奈何世之不察也其僞之不能辨而并以疑真其雜之不能識而乃以詆正讀易者動謂什翼非仲尼之旨讀周禮者輒詆六官爲戰國之書歌哭一言而洛蜀之黨遽成誠正一疏而僞學之禁遂起吁亦諄甚矣夫噎者創食食終不可廢爲寇者挾弓矢弓矢卒不可禁也乃僞書之紊經雜儒之病學亦僞者雜者之罪耳經與學烏可罪哉嗟夫二帝三王之道載在六經傳自孔氏如日月之麗天而未嘗隱也如江河之行地而未嘗息也苟能察之精合之大而守之篤則經自我會而渾然一出於真學自我明而粹然一歸於正天下無異道而

經學無異說矣一道德以同風俗有世道之責者可不加之意哉

[Faint bleed-through text from the reverse side of the page, including characters like '世計也', '漢初', '大啓', '九國', '周匝', '三垂', '遂有', '未大', '不制', '之患', '及建', '推恩', '之策', '子弟', '莫不', '畢王', '矣乃', '諸侯', '無擅', '命之', '強大', '農無', '詔祿', '之費', '其制', '可得', '聞歟', '唐自', '貞觀', '中疏', '屬王者', '已降', '為公', '其祿', '甚簡', '無庸', '論已', '及宋', '聚族', '而養', '之京', '師宋', '臣以', '為冗', '費熙', '寧一', '詔費', '遂大', '省其', '何術', '以救', '弊歟', '國家', '稽古', '定制', '封建', '諸王', '惇叙', '九族', '勝衣', '以上', '皆仰', '食縣', '官恩', '施甚', '渥已', '乃者', '熙洽', '既久', '支庶', '日蕃', '視洪', '武中', '不啻', '百倍', '竭天', '下之', '賦以', '奉之', '而常', '不給', '則祿', '將安', '出歟', '今賦', '歛非', '益輕', '而經', '費非', '寡也', '欲給', '之祿', '則國', '愈病', '欲議', '裁損', '而宗', '室亦', '困甚', '矣其', '何以', '兩利', '而兼', '濟歟', '夫莫', '親於', '宗藩', '莫嚴', '於祖', '訓計', '臣謀', '士蓋', '日夜', '籌之', '而莫', '得其', '便矣', '茲欲', '善推', '聖祖', '之意', '曲體', '宗室', '之情', '何施', '而可', '諸士', '居常', '則習', '論議', '茲國', '事之', '至大', '而最', '急者', '故相', '與圖', '之有', '可以', '明親', '親之', '殺佐', '元元', '之急', '者毋', '泛母', '諱侯', '持國', '論者', '采焉']

宗藩

隆慶庚午順天

問

古者衆建宗藩鎮撫王室所以固磐石之基為萬世計也漢初大啓九國周匝三垂遂有未大不制之患及建推恩之策子弟莫不畢王矣乃諸侯無擅命之強大農無詔祿之費其制可得聞歟唐自貞觀中疏屬王者已降為公其祿甚簡無庸論已及宋聚族而養之京師宋臣以為冗費熙寧一詔費遂大省其何術以救弊歟國家稽古定制封建諸王惇叙九族勝衣以上皆仰食縣官恩施甚渥已乃者熙洽既久支庶日蕃視洪武中不啻百倍竭天下之賦以奉之而常不給則祿將安出歟今賦歛非益輕而經費非寡也欲給之祿則國愈病欲議裁損而宗室亦困甚矣其何以兩利而兼濟歟夫莫親於宗藩莫嚴於祖訓計臣謀士蓋日夜籌之而莫得其便矣茲欲善推聖祖之意曲體宗室之情何施而可諸士居常則習論議茲國事之至大而最急者故相與圖之有可以明親親之殺佐元元之急者毋泛母諱侯持國論者采焉

執事以宗藩日盛卽祿歲增圖所以明親親之殺而
佐元元之急慮至遠也愚生亦深惟其難而竊圖其便
矣夫衆建支庶以屏王室大業也食租衣稅世世勿絕
大恩也載在祖訓畫一而守之久矣今更制易法則
有紛亂約束之譏以義斷恩則有別疏骨肉之罪忍而
坐視則蠹耗愈甚卒有土崩之憂僅而補緝則苟幸旦
夕不救衡決之禍故雖計臣謀士莫爲破盈庭之言而
建必然之畫者難之也雖然釋今弗圖則後世之難且
十百此矣請試言之漢初諸侯王置吏握兵同制天子
其患在强大而不掉自武帝推恩分王則宗室子弟莫

不受地矣然王之庶子間爲列侯侯之庶子絕無爵土
有去而爲民者有爲民而復仕於朝者自是而後無諸
侯王之患亦無養宗室之費其經制定也唐之末也帝
裔王支流播民間其患在離渙而不屬自宋養之京師
則五業之後騷然煩費矣其後辨親疎之等明甄序之
法袒免以下不復賜名敦宗之院散居都邑故宋雖費
於前而大省於後其救弊早也由是言之勢有所必極
極則必通恩有所必窮窮則必殺茲非其明效大驗耶
高皇帝神武開基忠厚立國故利建宗子以疆本
朝明惇睦之誼以先天下然是時宗室之衆無幾可按

籍而數也今熙洽二百餘年麟趾爪爬綿昌浩衍麗屬
籍者四萬而存者二萬八千五百有奇以祿計之不下
八九百萬設一傳再傳而後其生齒什倍其祿又當什
倍此勢之所必極而恩之所必窮也故欲竭天下之賦
以奉宗室則國益病裁宗室之祿以紓國計則宗室亦
益病何者今賦歛非減而積貯非盈也乃水旱爲災迄
無寧歲諸邊轉餉未見休時財力亦甚詘矣加以宗室
之祿日引月長則賦安得不竭而國安得不病語曰附
枝大者賊本心此善喻也且宗室至貴倨也又非人人
能謀生也今祿旣益微網亦少密業已困矣而有司奉

行條例一切以法繩之令搖手觸禁資身無策則安所
歸命也蓋宗室亦極病已語曰饑寒切於人之肌膚欲
其母爲奸邪不可得也此非細故也故雖桑孔握籌鼎
賈挾策而圖今日之敝終不能兩利而兼得矣愚故曰
勢之所必極而恩之所必窮胡不引漢唐宋之事以觀
之也夫揚湯止沸無益也不如絕薪止火而已子孫而
守先人之廬至於棟折椽傾不得不撤而新之爲其將
壓也今承 祖宗之業視國家之敝不思變通安全之
則何異以指撓沸以繩維傾乎愚以爲 祖訓至嚴而
善推 聖祖之意則猶繼述也宗室至親而曲體宗室

之情則所以親親也何以言之宗國初親王歲祿五萬他賜予甚盛不數歲而裁爲萬石又以民貧賦少給代肅諸王僅五百石或千石耳夫莫富於海內莫親於天子之子不加賦而奪之祿者以爲寧儉宗室而不可以耗國計疲民力也祖訓言將軍以下有材能者得改官陞轉如銓選法夫旣富貴之矣猶不絕其仕進者所以興其善行而消其怙侈使外有親賢之重而內有亡費之利也然則聖祖之意可推也人情孰不欲生全而惡危亡趨富厚而逃貧困然令予之虛名而奪之實惠則三尺童子不願有矣曩者宗室獻議有請試官

自效者有請力田自給者夫田農至拙業也簿書之吏至詘體也猶願爲之彼擁有爵之虛名而棄資生之實惠其情固弗樂也然則宗室之情其當議者有三以正倫分則封爵當議以廣德厚則禁例當議以節浮冗則恩數當議何者天下之法未有莫爲之限制而能世世無弊者也古者五世袒免六世而親屬絕至於祖宗之廟猶限之以七世親盡而迭毀今已絕之屬猶儕於五服之親則無等也忍於親盡之祖而不忍於親盡之子孫則舛也誠宜按諸屬籍別其世次而爲之限制如親王世及矣其次封郡王者可限也郡王世襲矣其次

封鎮國將軍者可限也諸將軍中尉以嫡相繼矣其一子降封之外可已也奉國中尉一子得襲矣其世世承襲之例可已也大抵以位尊卑爲之多寡以世親疎爲之隆殺其不得封者皆如漢列侯庶子之法則坐食可益省而詔祿可繼此封爵之當議者也古者公族得仕於朝非絕之也庶民之家得占田治生非禁之也今宗室特以例見疑是以賢愚同滯而人無聊生矣旣限以封爵則絕封之始宜人予之貲賦之間田以爲永業令家自爲養而盡弛出城諸禁其材者得應舉試外官如常法或懼其縱也則如蘇轍所謂臨以按察持以察吏

威以刑禁使不材者不至害民賢者有以自效顧不可乎此禁例之當議者也且夫禮所以爲節而法所以爲懲今疏庶人有給已猶無罪也已罪黜而猶給之與詔祿無別非所以爲懲也自郡主至鄉君有祿已猶同姓也至諸儀賓得聯姻王室貴重矣其祿不省非所以爲節也愚以爲諸降庶人者宜皆與絕封庶人同法郡主視郡王之限縣主以下視將軍中尉之限祿皆半給餘皆量給婚資則恩澤不至冒濫費必大省此恩數之當議者也如是則可以清蠹耗之原紓待哺之困上無失聖祖之至意而下能通乎宗室之情大較若此矣然

愚聞之救弊者必反其始更化者必虞其終今封爵限
矣得無有怨望而羣譁者乎禁例疏矣得無有恣睢而
爲暴者乎恩數節矣得無有顛連而失所者乎則愚又
以爲盈縮之議在下而操縱之機在上惟 聖天子燭
安危之故恢繼述之圖毅然獨斷而力行之示 諸王
以大義不得不通之法則必有河間東平之賢奉宣德
意而深樂其便者何至於羣譁有爵者制之於王國絕
封者治之以有司何患乎爲暴且齊民非廩於官而固
有比於封君者宗室而有永業世世無有所與設 天
子不忘恩厚舉古賜民粟帛之令以間恤之何憂乎失
所較之歲祿不給而羣辱有司犯禁而不止救死而不
贍者利害相百也此之不爲而顧彼之久行至於勢不
可復及恩無所復施則其害不獨宗室且移之社稷矣
故爲之於可爲則易爲之於不可爲則難今 天子仁
明英斷釐弊剔蠹以興至理賢公卿能矢謨陳力爲國
家任大事以圖大功則何有於草野之言哉姑以復明
問云爾

六經

隆慶庚午山西

問孔子刪述六經垂訓萬世蓋昭昭如日焉自楊雄
 王通氏始為法言中說以擬論語而雄復著太玄
 以準易通續六經君子非之以為僭然宋之諸儒
 亦有太極圖通書定性皇極西銘等篇彼盡黜漢
 儒而自精醇其語寧無意於續也然易繫有非夫
 子所撰者乾坤多餘章而毛詩雜淫風周禮缺冬
 官而大學缺格致禮記雜出漢儒之手春秋如公
 穀各泥其師說訖未有定不知雄通輩何以不敢
 討定而敢於續也今論者往往有異議如謂冬官
 格致本不缺大學周易有古本之類其說可盡舉
 而折衷之否

六經其猶日月乎其體歷萬古而不虧而其用亦時有
 所不及故夫日有夕而月有晦幽崆蒨房之下郤容光
 而自遠勢不得不假之於燭夫燭者所以佐日月之光

於不及者也訓詁之學翼而明之者也立言之學廣而通之者也皆所謂燭也取燭而作之光於不及則可以燭而配日月之光而謂之三不可此楊雄王通氏之所以失也楊氏之爲玄也凡三方九州二十七部八十一家二百四十三表七百二十九贊極之以三策關之以休咎緝之以象類播之以人事文之以五行擬之以道德仁義禮智爲其太曼漶而不可知故有首衝錯測攤瑩數文視圖告十一篇皆以解剝玄體離散其文雄之自叙云爾其意則曰此非楊雄氏之玄而楊雄氏之易也要之無易而後可以有玄有易矣玄何所用之

且玄之體方而易之體圓圓則不待擬議而自成方則必待假借而後就故說者謂楊雄僭也王氏之擬經也大抵以漢七制續書以曹劉顏謝之篇續詩其所贊易卽關子明之成筮論其所定禮則叔孫氏之綿蕞儀其筆春秋則止陳仁以配獲麟其要如此而已其意則曰此非六經之經而王氏之經也要之可以言傳而不可以言經有六經矣夫安得而配之且其所謂七制諸篇者何敢望典謨雅頌之藩籬而關朗叔孫不過支離糟粕之近似若元經之帝兩魏出蜀漢而夷江左大旨亦已悖矣故說者謂通亦僭也至於法言中說雖若有出

於模擬剽竊而往往能尊正道發微言於千載之後特所謂法言者言多遠而指則近故不免於晦中說者說雖暢而理或支故不免於雜至有謂通與李德明不相及而唐初諸貴臣稱門人者不一舉其名以爲阮逸之僞撰雖未必盡然要之亦有可疑者矣宋興周程氏者出蓋盡屏諸儒之說而澤於道德醇如也周氏之爲太極圖說也標理於極而推功於靜其爲通書也表裏太極之說而加詳於聖賢之學程氏之答定性書謂已性無內外動亦定靜亦定也張氏之作西銘謂理一而分殊人當以事親之道事天也邵氏之皇極經世諸篇明

天地之消長推日月之盈縮與陰陽之度數剛柔之形體經之以元紀之以會參之以運終之以世蓋得易之變而推廣之者也要之其爲說雖正大而微妙然豈有出於六經之外哉楊雄王通氏急於得經之名而緩其實周程張邵氏精於得經之實而避其名此所以異也而後之持正論者必欲深文巧詆以中通雄之罪至目之爲僭竊等之爲異類蓋至於莽大夫楊雄死而千秋不傳之統直接之孟氏愚以爲六經至孔子而止矣卽孟氏與宋諸賢亦翼而明之廣而通之者也特所謂燭者其光有大小而佐日月之功有隆殺耳夫陽避其名

而陰紹其統愚不得爲通雄二氏稱屈也執事謂六經自秦火之後不能不有所遺錯以討定之責責雄通氏愚謂非二氏所能辦也今請得而畧言之謂繫辭之十翼有非夫子所撰者序卦之或強也而雜卦之或雜也謂乾坤之二卦自彖象而外夫子所贊皆當屬之於繫辭是一說也謂夫子曰放鄭聲而鄭衛淫奔之詩不廢或曰放者聲耳存其篇以示戒也或云非夫子之舊也周禮缺冬官矣而河間獻王輒以考工記補之其能合於聖人之政否也有謂五官之中如縣師廛人之類皆在所少者惟王一條耳是一說也大學缺格致矣而朱

子輒取程子之意補之其能合於聖人之心否也有謂知止末二條卽格致之一章固不缺也是亦一說也禮記所載大學中庸旣別表爲一書而其它篇多不出於夫子緇衣公孫泥子所撰也月令呂不韋所脩也王制漢文時博士所錄也其它檀弓儒行等篇要亦有大醇而小疵者至於春秋一書左氏詳於事而畧於旨公穀守其虛而忘其實穀梁以衛輒拒父爲尊祖不納子糾爲內惡公羊以祭仲廢君爲行權妾母稱夫人爲合正蓋范甯固已言之至於胡安國而始以其說探聖人之心於千載之上然聖人之賞罰固已明而聖人之所以

用其賞罰者未免流於刻也夫所謂廣而通之者固不暇論而所謂翼而明之者其亦有人矣乎諸儒生遵高文之訓白首守其師說而不敢廢愚則何敢言愚所謂書之有古文雖稍異其語易大學之有古本雖稍更其序而大旨不甚遠固無可論詩之淫風存者出於夫子之手孰得而議之第在鄭衛則絀它說而附於淫在異國則又絀其淫而附於它說不知可更一裁定否也周禮之冬官或悉取五官之屬者而補之簡斥劉歆之傳會合儀禮禮記而爲一經可乎取月令檀弓緇衣王制儒行之類稍未醇者取家語及魯論之爲門弟子言

者各降而爲傳以與孟氏並傳可乎取左氏之事而絀其浮取公羊之例而絀其鑿取穀梁之旨而絀其偏裁以胡氏之法而絀其刻更定爲一書可乎要之非其急者自強不息而吾心之易在矣允執厥中而吾心之書在矣思無邪而吾心之詩在矣毋不敬而吾心之禮在矣春王正月而吾心之春秋在矣得其要則六經爲吾用而其語皆筌蹄不得其要則吾爲六經役老死而汨汨於章句雖然愚之所甚憂則不在此今世之學者於書偶有所窺則欲盡廢先儒之說而出其上於道未有所得則已力排先儒之詣而閤其統不學則借聖門之

一以文其陋無行則逃之性命之鄉以使人不可詰此
又宋賢之罪人而楊雄王通氏之所近似而不取者也
愚之所甚憂者此也

訓儲

隆慶庚午山西

問太子天下本學士大夫類能言之而莫詳於賈誼
其說果盡出於誼否也三代而下不能蚤豫教故
其治不古若亦可聞其畧否夫論子道者則有溫
嶠之侍臣王褒之太子二箴示君道者則有唐文
皇之帝範十二至我太祖高皇帝及成祖
宣憲諸廟皆勒成一書以示皇太子其旨與
帝範同異否今上之元年即詔立元良以定
國本天下欣然謂吾君有子矣夫出閣之期
已示而所以輔導匡翼之具未悉諸生其
為我詳言之庶幾備承華寶鑑之一二云

自賈誼所稱天下之命懸於太子太子之善在於早諭
教與選左右有味乎其言之也雖然非自誼始也書尹
之誥曰一人元良萬邦以貞蓋言本也易蒙之象曰蒙
以養正聖功也蓋言學也唯禮與左史書大傳亦有之

其畧曰古者后妊七月而就宴室所求聲音非禮樂太師緼瑟而稱不習滋味非正味太宰倚升而曰不敢以待王太子所謂胎教也生而接以太牢士負之有司齋肅端冕而見之南郊所謂襁褓之教也能行立矣道之禮過闕則下過廟則趨所謂童穉之教也少長始知色則出齒於太學教之爲人臣焉教之爲人子焉教之爲人幼焉母使異日有一人之肆也十八曰孟侯孟侯者於四方諸侯來朝迎於郊問所不知母使異日有深居之悔也故太子立而置太師太傅太保及乎旣冠成人則有記過之史徹膳之宰敢諫之鼓鼙史誦詩工誦箴

諫大夫進謀士傳民語愚竊以爲其備官也非好糜祿也非欲其敵儀於至尊也欲使左右前後皆正人以漸摩其德也鷄鳴而起一日而三朝非故欲勞之欲其習於勤也其與國人齒也非故欲卑之欲其習於恭也自周之末暴秦繼之人主不盡能舉三代之所以教者爲教而太子亦不盡能舉三代之所以學者爲學其始也子道缺而躍龍之地或危其終也君道缺而飛龍之地或亢是故秦之胡亥受治獄於趙高晨卽位而暮射人而望夷之禍成矣漢之戾園開博望通賓客多以異端進巫蠱起而長安兵而湖陰之禍成矣開皇之際嬖子

窺嫡楊素進而房陵之位不終矣德宗之末宮案無擇王伾叔文進而永貞之治損矣至於漢靈康僖之季父張讓而母趙忠定策國老而門生天子帝位予奪於左貂人主食息於中涓宦官之勢重而天下之大計移矣故温嶠之箴侍臣也則曰均士抗禮以卑厥情入學齊齒言稱先生不以賢自臧不以貴爲榮思有虞之蒸蒸尊周文之翼翼屏彼佞諛納此亮直言太子之職所當盡也王褒之箴太子也則曰勿謂居尊禍福無門勿謂親賢王道無偏無爲慮始無爲事先損之又損全之亦全言太子之地不易居也斯二者皆所以語爲人臣子

之道也唐文皇製帝範十二則冠之以君體而建親求賢審官納諫去讒戒盈崇儉賞罰務農閱武崇文之類次焉皆所以語爲人主之道也燦然備矣惜也其言教詳而身教畧也承乾儲而不終高宗帝而不帝有以也

明興 高皇帝甫立 皇太子卽建大本堂居之積

武庫七畧之書而聚天下之英俊者碩從容談說經義賜宴賦詩最後宋經傳格言爲書曰 儲君昭鑒錄俾日進講曰若等務導之以正他日勝重任也至 文皇帝而稍克廣其書益以 高帝之謨訓曰文華寶鑑召皇太子授之曰脩己治人之要盡矣若其勉之 宣

宗之爲 帝訓也篇凡二十五始君德而終藥餌也
憲宗之爲 文華大訓也卷凡四進學也養德也厚倫
也明治也要之其命名與帝範同而章軌與唐文異
明德隆隆嗣三代矣自青禁之制不講於 先朝朱邸
之開僅同於藩國海內皇皇然若靡所瞻望 上卽位
之初元卽下 詔立 皇太子推恩海內其明年復示
出閣之期以十齡奏聞温文日新岐嶷天縱中外億兆
臣庶咸欣欣焉思獲奉盛美開天下萬世太平根本而
草莽下臣不勝私憂過計以爲太子之體不患其不崇
患其崇而無所接異日君臣之分不患其不辨患其辨

而至於不相通今雖未能猝復古制如所謂拜師而齒
學者亦宜少采貞觀至道儀節三師賓客見則必假以
殊禮從容燕閒啓沃治道其諸寮案亦聽坐侍講讀反
覆開陳以畢所見所講讀諸書自六經四子及 先朝
謨訓外別命儒臣脩纂六曹職掌今時要務如財用困
乏民業艱難武備積隳士風日卑及它一切吏弊國蠹
分條附見務令剴切不必宏深勒成一書專備詢覽
人主時時考問觀其進否而稍抗法於其左右至於坊
局諭贊之官必選清方直亮通明該練者克之勿急才
藻以長浮華勿廣遴諮以滋躁競其內而保姆阿監必

委長年母令見少麗以犯未定之戒服御居舍必崇儉
朴母令見竒衰以開奢侈之漸率土之臣皆其臣也母
以贊御僕從爲私人天下之有皆其有也母請莊田店
宅爲私藏 太子徧識萬類之情而不見其用尊在

一人之下而不廢其謙中心無爲以守至正唐虞三代
之化端在於此雖然愚之私憂過計猶有不能已者蓋
國家雍熙之治莫盛於宣德弘治間而及其後也頗
不滿於二正之季彼其出而亂二正之治爲振爲瑾者
乃宣弘所用以待青宮之人也今六局丞郎而下縱無
其人可不預爲之所乎寧侗而母愛其儂寧緩而母愛

其捷寧稚無能而不必其有技寧目不知書而不必其
多識此在 人主及輔弼大臣加之意而已

從祀

隆慶庚午山西

問

太廟之時饗也與文廟之釋奠也蓋皆有從祀
 焉豈亦出於報功崇道之意歟其禮始何代而損
 益何主大較可得聞否 國家於典禮至明備也
 先帝蓋惓惓致意焉今 太廟從祀之臣自
 成祖而後寥寥矣不聞有議增入者文廟之兩廡
 自元季而後寥寥矣間有議增入訖於今未定者
 抑果難其人耶或慎重其典不輕舉耶 國家熙
 明累洽之運以崇德右文稱而使 列聖無臣孔
 門無賢甚愧不取也諸士子熟琬琰之編且事俎
 豆久矣其母曰鄒人之子不知而不以告也

太廟之有從祀者謂能佐其主衍斯世之治統也以報
 功也文廟之有從祀者謂能佐其師衍斯世之道統也
 亦以報功也其典歸之秩宗而其議掌之太常雖德之
 者不能舉無功之祀怨之者不能廢應祀之功斯禮也

人主行之以厚道而持之以公道者也蓋愚嘗讀商盤
庚之告曰茲予大饗於先王爾祖其從饗之及洛誥曰
記功宗以功作元祀而後知先王之用情於其臣也又
嘗讀周禮大司樂以治建國之學政而合國之子弟凡
有道有德者使教焉死則以爲樂祖祭於瞽宗而後知
先王之用情於其師也生而共其祿於朝死而共饗於
廟而君臣之體一矣生而以茲地嗣其教沒而以茲地
配其饗而師弟子之體一矣夫禮有其舉之莫敢廢也
禮舉矣而不備於盛世君子之所以爲禮恥也禮備矣
而世無其人以應之君子之所以爲盛世恥也 太廟

之有從祀其制見於周而其議詳於高堂隆任茂大抵
以一代之臣配一代之君而已至唐而可考者淮安靖
王神通梁文昭公房玄齡而下距太尉李愬凡三十二
人也至宋而可考者韓忠獻王趙普濟陽忠武王曹彬
而下距丞相葛邲凡二十四人也其它固代不絕也夫
金裔夷耳而猶能舉斜也粘沒喝兀朮張浩輩之祀而
况不爲金者乎文廟之有從祀其禮起於漢延光而其
議定於唐貞觀大抵以其有功於聖經而已而不必盡
論其人也故貞觀之詔自左丘明卜子夏而下距范甯
賈逵人蓋二十二也宋至元豐而益者荀况楊雄韓愈

也至淳祐而益者周敦頤張載程顥程頤朱熹也至景定而益者邵雍司馬光也其它固代不乏也夫元荒虜耳尚能進董仲舒而其人許衡吳澄者應之而況不爲元者乎 明興 高皇帝之初念無以昭宣諸功臣之烈建 太廟首議以李韓公善長等六公及胡越公大海等從饗最後韓公坐嫌死而六公亦間不得與逮永樂而始定自中山開平二王而下距永義侯世傑凡六王五公一侯十二人從 文皇帝祀者至洪熙而定文武臣惟河間王玉東平王能寧國公真榮國公廣孝二王二公而已 先皇帝之世於 宗廟大典蓋惓惓焉

焉首上 太祖徽號及追上 文皇帝祖號已采禮官言進誠意伯基從祀 太祖位六王下而以僧故斥廣孝使祀大興隆寺尋用翊國公勛請進其祖管國公英天下不以私病英而以公快基廣孝謂英功足稱也獨仁宣而後寥寥無聞者過也夫承平之世先文德而後武功則 列聖之丕承宣明治道抑何章章著隆也 恐使萬世之後謂 明有君而無臣不得比於唐高宋真之季耶夫以楊文貞李文達商文毅劉文靖楊文忠之賢於輔而不得從蹇忠定王忠肅王端毅馬端肅之賢於銓而不得從于肅愍之賢於樞而不得從張定興

輔之三下南交朱宣平永之八佩將印皆位太師握環
衛爲心膂牙爪而不得從何也其人縱不能與中山開
平等豈盡出世傑真下耶愚以爲禮官臺臣當一建白
下公卿大夫博議而精覈之進其灼然者不爲過也
高皇帝又念無以表揚我先師之道 詔革天下神號
而獨不以及夫子且謂所封爵及諸從祀者俱如故至
正統而益以胡安國蔡沈真德秀吳澄 先皇帝之世
於文廟大禮愈惓惓焉凡再釋奠 幸太學爵改王而
爲師神改像而爲主佾改八而爲六蓋前是從祀者奪
楊雄矣已采輔臣言退荀况馬融劉向賈逵王弼何休

戴聖王肅杜預吳澄而罷其祀抑鄭衆盧植鄭玄服虔
范甯而祀於鄉進王通胡瑗楊時蔡元定最後以濮議
故進歐陽脩天下不以私訾脩而以公許王通等謂脩
學足稱也然此皆先世儒耳至於 明而獨寥寥者過
也夫治統與道統而俱盛卽 列聖之嗣德揚詡教化
抑何孜孜不替也忍使萬世之後謂 明以功而不以
德至不獲比於元馬上之俗耶當嘉靖中言者請進薛
文清瑄從祀會議且定矣一二沮之者謂其鮮著述無
大裨益 天子伸其說而屈其請今 上初言者欲併
合王文安守仁陳檢討獻章而祀之復下羣臣議其許

瑄者十而九其許守仁獻章者十而二三而卒莫定也
豈非以瑄經行淳備篤信守死出處以道有功聖門至
於守仁則因其致知而疑其慧於獻章因其主靜而疑
其寂耶其近於慧與寂者其流之罪也非其師說也是
三人者縱不得與二程朱氏等豈盡出胡瑗楊時下耶
愚以爲禮官臺臣當再一建白下公卿大夫博議而精
覈之進其確然者不爲過也然自 高帝諸功臣而下
尚有說焉李韓公之佐開創固不下鄴侯雖以嫌死
帝尚爲諱之若馮宋公勝之佐大將軍取中原下秦隴
降納哈出二十萬之衆傅穎公友德之從大將軍取山

東其平蜀功冠諸徹侯而開滇南二百年之地惜其終
於 帝之末遭革除之變而未有舉也勲烈固伯仲岐
陽而子永義矣縱不得從 太廟祀亦宜別於其鄉隆
其贈謚而錄其後不宜使子文之勲爲若敖氏之餒鬼
也彼於聖門而稱學者若吳聘君與弼之介胡布衣居
仁之敬魏恭簡校之端羅文毅倫文恭洪先之守似亦
可祀於其鄉今恭簡有專祀而諸君子未備不可一次
第舉乎而愚又有進於此者 先朝之黜漢儒凜乎斧
鉞矣夫卑漢者所以尊宋而不知其陷宋儒於背本也
令訓詁之學不傳卽明哲如二程朱子亦何所自而釋

其義乎愚以為若盧鄭等者復其祀於學而劉向吳澄輩專其祀於鄉可也斯禮也愚能言之即執事能聽之而議者未必許也今天下難其典而易其人者何也遠者不能悉其實而近者有所疑於心也愚故曰斯禮也人主行之以厚道而持之以公道者也

[Faded vertical text, likely bleed-through from the reverse side of the page]

理財

隆慶庚午山西

問太史公有云天下熙熙皆為利來固聖門罕言之然大學稱理財冢宰制國用豈非以當世所急也耶即不敢與諸儒生為雅言夫齊越蕞爾國耳管夷吾計然為之謀而卒以富役天下桑弘羊一賈人子然當漢疲耗之極而營之使大農有奇羨劉晏幹吏也以區區十五道之賦而供度支不乏果何策也今天下雖號全盛然中外恒枵然若果然之腹不能以月計大司農時時告不支矣豈其源尚有可開而其流或有可塞歟願與諸生商之以觀有用之學且上主計者采焉

執事拳拳以理財之要下詢不佞書生也授之握算不知縱橫其何以仰佐末議于主計者雖然敢不罄所見聞以對大抵富國易富天下難富未開利之天下易富已開利之天下難得人而專聽其法易以法而強授之

人難夫管子者古所稱能富國者也今其書曰錯國於不傾之地積於不涸之倉藏於不竭之府所謂倉與府者五穀桑麻六畜而已其外則官山海所謂負海煮海負山鑄山籠百姓之利而收之官而已又其外則制罪大小人以兵甲鈎金束矢而足五兵而已財有餘則借以使敵如貴買莒楚代衡山之物以疲其上下之力於物而已故天下弱於齊之富而齊霸所謂能富國者也其次莫若計然計然之書曰知闔則脩備時用則知物二者形而萬貨之情得故積著之理務完物無息幣以物相貿易貴上極則反賤賤下極則反貴貴出如糞土

賤取如珠玉財幣欲其行如流水行之十年而越大富以其貨傾吳而橫行江淮間所謂能富國者也然此一方耳四封之內皆鄰敵也其流易達而輸易委盈縮易曉也我故得而發我之贏而時中彼之急收彼之無用而爲我之有用母之權長在我而子之息長在彼肥我而不憂彼之瘠損彼而不爲我之累故曰富國易也若夫天下則不然盡四封之內外而皆吾地也其人則皆吾人也肥在左則瘠在右損在遠則累在近管子計然之策有所達而不必盡達也故曰富天下難也漢武帝因文景之遺貨不勝其溢而脩怨於匈奴已脩威於東

韓西域南夷已又脩其欲於宮室帷帳遊幸之事河決歲侵又從而齟齬之蓋不數年而大農少府水衡之金錢米粟盡矣於是桑弘羊爲治粟都尉筦天下鹽鐵乃請置大農郡丞分部主郡國各往往縣置均輸鹽鐵官令遠方各以其物貴時商賈所轉販者爲賦而相灌輸置平準於京師大農之諸官盡籠天下之貨物貴卽賣之賤則買之抑天下物名曰平準又令吏入粟補官罪人得贖罪禁盜鑄告緡錢算輶車船賈人一歲之中太倉其泉滿邊餘穀諸物均輸帛五百萬匹民不益賦而天下用饒今世諸儒者掩口不欲道弘羊弘羊故心計

臣非諸齟齬儒者比也雖然謂弘羊能開之則可謂弘羊能生之則不可蓋漢興人主世世守共儉宮室之湯沐不以煩大農而悉推山澤關梁之利以予民民得恣取而無禁故農利十一工利十二而商利十九至武帝國家之用始不足而弘羊輩始得以其心計而通利孔執事試屈指而籌今之天下於漢賦財法嚮所稱有一之不備者乎弘羊而在更何所加故曰富未開利之天下易富已開利之天下難也當肅代時戶口之耗十八九人主而下至六師供邊之費悉仰給於劉晏之十五道晏好用廉勤吏先愛民故非弘羊比也然其大旨不

過在於捷得四方之物價使食貨輕重之權使司恒爲之掌握利在官而害不在民其所謂愛民者又不過捷得四方之豐歉豐則糴歉則糶以兩利而相濟其所謂理財者不過寬予鹽商之資以收鹽利厚處漕艘之費以收漕實而已故謂晏能整齊之則可謂晏能生之則不可執事試籌今之天下卽有如弘羊晏者在能捐百萬金而不之問乎能聽其自辟召立富貴人乎左右不中制而臺省不外議乎故曰得人而專聽其法易以法而強授之人難也邇年國用乏大司農不能當中旨數更易中外士大夫朝夕以用爲憂公車之牘至累月

不能竟十道之使旁午而未久輒報罷鹽政壞而思復其舊計開中之入更損二十萬緡且中止矣屯政壞而思飭其舊計其羨僅足以供本軍行之三年而復廢專官矣欲鑄錢而計鑄之入不能當其損矣欲設官會行鈔法而國家不能出數十萬金以爲之母矣累世之蓄困於先朝之工禱而天府竭矣爰贖之所積困於頻年之徵解而郡邑倉庫竭矣水旱蟲蝗加以無名之賦而閭閻竭矣廣盜起而所費者歲以數十萬計而五嶺之公私貧矣河決而所費者以百萬計而青徐兗豫之公私貧矣外有日重而必不可已之邊計內有日益

而必不肯已之 宗藩然則如之何曰此在 人主精
思之委計於大臣而後可也邊計不可已則加重於主
兵而少調客兵使兵得息而食減 宗藩不可已則漸
限其封爵而聽其從四民之利使人自便而祿減罷不
時宣索則 六宮之用簡而戶部舒停非時工役則將
作之用簡而冬官裕清內府工匠力勇之數覈錦衣騰
衝府軍之籍則客食省而漕糧有餘毋輕以一人言而
遽興毋輕以一人言而遽革則 國是定而司農得少
展其技嗟夫入利之孔開已盡矣然細而不勝其出利
之孔語云涓涓不竭將成江河況若江河之決乎哉故
其德莫大乎節儉夫節儉者 明主之所以優爲而左
右之所不甚喜者也 主慎於賞賜則左右見以爲寡
於澤 主難於興作則左右見以爲窮於侵 主精於
搜覈則左右見以爲無所匿其弊故自古中外之臣言
及利計毋論其可否也朝上而夕報可至著爲令甲有
之言及國蠹毋論其重輕也朝上而夕報罷甚且付廷
尉矣噫卽管計諸才臣杜口可也

禦虜

隆慶庚午山西

問夷狄之為中國患也久矣邇者益益証焉以戰則多餒以守則多瑕孳孳然聚天下之策而日講求之而卒不得其要領夫我之所以不敵者其故何也虜雖強其視匈奴突厥女直蒙古孰類今縉紳之士或議戰而介冑之士或更議守要必有折衷者明威德薄海內外今縱不能犁王庭鹵老上而勒石於燕然之顛四郊多壘即何策以洗其恥乎諸士子之鄉中虜數矣其必有習者明以語我

中國之不能與虜敵也久矣而今為甚其說凡有八曰聚散之勢不敵也大約中國勝兵與虜控弦之騎校之可各得三十餘萬我散而為九邊而虜長聚是以九而攻我一也其不敵一也勇怯之實不敵也賊便馬疾鬪耐饑渴上下馳逐若風視死若赴而我於是數者無一

焉其不敵二也勞佚之形不敵也虜因糧於我我裹糧而應之不待三日而自困其不敵三也騎步之力不敵也我雖騎不能疏行突鬪而爲騎陣賊無所不衝而我無所不應其不敵四也攻守之機不敵也賊旣闌入邊扼宣大薊晉之要衝而居之馬首東則東犯西則西犯彼無所不攻而我無所不守其不敵五也客主之變不敵也賊入而烽始舉烽舉而兵始出賊顧爲主而我顧爲客彼得從容設伏以誘我其不敵六也專緩之計不敵也虜自春而至秋其上下日以入寇爲計自辰而至夕其事非鬪卽獵其所工非騎卽射而我之吏士則營

營焉不憂鬪而憂其妻子爲文武大帥者不憂外而憂內又加以文法簿書之是牽逢迎便辟之是熟而望其能膺懲大慙哉其不敵七也上下之情不敵也虜自其主帥以至於鬪卒無貴賤一也其嗜欲易通而沈懣易達也我士卒之於偏裨偏裨之於大帥武吏之於文吏邊臣之於大臣若隔九閭焉而何以責之效力也爲虜間諜者本我中國之民而以我情予虜爲我烽堠者本我中國之兵而以我情予虜其不敵八也夫所謂八不敵者審矣然而虜卒不能爲我害者何也是匈奴突厥之虜而非女直蒙古之虜也夫所謂女直蒙古之虜何

也自其立國之始而地半已中國矣中國之民安虜而
不相鄙也虜安中國之俗而不爲苦也故以中國攻中
國而虜得饒於戰以虜供虜而虜得深入而久居也若
夫匈奴突厥則不然其嗜欲不合也其居處不便習也
其寇也利中國之玉帛貨賄而不必有其地利中國之
子女技作而不必有其民匱則至羸則出月盛壯則攻
戰月虧則退兵深入則虜歸久居則虜疾中國之所以
獲支吾而稍息肩也夫不求我之所以勝漢唐者而幸
虜之尚爲匈奴突厥愚以爲中國之計左也夫薦紳守
和親而介冑言征伐自古則然今薦紳之士不習虜者

則曰虜亦人耳此其衆不過當漢一大郡戰不勝則誅
帥守不固則誅守臣吾法行而前固無衡虜介冑之士
習虜者曰不然虜鬪士勇三倍我其馬力十倍我試卽
邊兵人校之其見虜而不股栗者十不一也其能角虜
而互見其技者百不一也夫士畏敵而不畏將將甘死
法而不死敵何以言戰哉愚以爲皆非也愚非能挾纊
苴臙起之秘起衛霍於九京而與之策也不過諸邊大
夫之所恒知者其畧曰審形勢明賞罰定國是重將權
而已夫所謂審形勢者不敢遠及秦諸邊也姑請言其
近者宣大之險與虜共矣其法當以戰而爲守山西薊

邊險猶在我也其法當以守而爲戰以戰爲守者非必戰也我棄小堡而併於大堡堡宿銳士栖餼糧擇帥以統之使不可下而簡募精騎如所謂百保鮮卑者分屬諸驍將以爲奇兵或擊其抄卒使不敢散而輕我或襲其輜重使不敢易而近我然後多間諜以離其黨廣招誘以弱其勢十年之內虜庶幾且遠乎以守爲戰者非必守也虜不入則堅墉浚濠宿兵以待之虜入矣清野以疲其騎清野矣堅壁以防其攻壁堅矣設疑而誤其路路疑矣嚴兵而尾其歸此所謂守道也不然而責宣大以守是坐困也責山西薊邊以戰是立敗也所謂明

賞罰者其說非徒謂峻罰也賞固當先之夫古將兵而峻於罰者莫過楊素將將而峻於罰者莫過漢武帝然而樂爲素兵者樂微功之見知樂爲漢武帝將者樂萬戶侯千金之易致也故酷罰者人之所欲避也而賞能奪之戰危者人之所易曉也而賞能愚之今國家於失律之法嚴矣獨所謂賞者極於數十金而所謂爵者不及世欲以此而售人之死命何也愚以爲人主精意於此如趙藝祖之別貯金帛封樁庫購虜首而又不愛通侯世爵之賞以待天下之負材而自喜者蓋朝奏功而夕報璽書母使墨吏持文法譏訶之而後嚴慘社

之令使天下有所甚欲者以易其生而有所甚惡者以易其死其不悉謀力而致之於敵者鮮也所謂定國是者縣官下求材之令人得舉所知銓部次第而用之矣其未用也人人皆諸葛亮而其既用也處處皆李元平固所用之才未盡真而所以待之之道未盡是也不見形而有所爲則議者得以其形而訾之稍破格而有所請則議者得以其格而繩之愚以爲今用人自督撫而下宜精簡其選既用之後則精專其任而徐待其成一切建白指摘凡屬煩言閣不令下可也所謂重將權者今督帥之委非不重也然陽示之重而陰迫之輕爲之下者自一命而上卽有奧援拂息頓笑皆懼觸怒然猶平居言耳賊一入而督帥不能行之大將大將不能行之偏裨盖有令下而嘻出而指相目曰此廷尉人耳非而主也故愚所謂重者居平不爲之中制賊至則聽其誅賞賊退務覈其情實而已凡愚所以對執事者踈節濶目不能爲必勝之筴也異日倘捐前箸而借我尚當以根本之說進

交泰

隆慶辛未會試

問易之泰曰天地交而萬物通也上下交而其志同也言泰者固在君臣相與間矣夫泰之時和氣洽而理道昌一有壅闕不足為泰在昔明君良臣相與開泰於先保泰於後者用何道歟君臣遇合蓋古以為難而胡以交歟唐虞三代尚矣漢而下有講論經理夜分乃寐者有制諫官隨宰相入議政者有降手詔給筆札者有請輪侍從直宿以待宣召者亦庶幾所謂交泰歟嘗伏讀大誥首君臣同遊聖謨遠矣頌盛德者謂開泰莫如二祖保泰莫如宣孝二朝當時謀臣策士耆舊老成侍惟幄圖國政以佐致昇平者可悉數歟朝講之儀載在令甲備矣乃又不時宣召得無煩且勞歟我皇上臨御以來講學勤政嘉與百執事共登太平之理湛恩威命即叙遐荒斯亦交泰之驗已抑古人有言行百里者半九十且夫平能憂陂徃能思復泰之旨也願推廣其說以為今日保泰之助

夫君臣之際其天地之交乎是故先天而開泰也相與
定一代之鴻圖後天而保泰也相與建萬世之長策聚
精會神相得而益章顯志弘業相須而共濟盛美益乎
當世聲光流於無窮蓋自唐虞以及 昭代致理之原
古今一揆矣愚請繹泰之義先著君臣之所以交然後
鋪張我 祖宗休烈可乎易天地交泰后以裁成天地
之道輔相天地之宜以左右民夫泰之言通也后以裁
成輔相爲事蓋身視臣庶而家視寰宇使元首與股肱
弗相聯屬則精神不貫而身病使主伯與亞旅弗相親
比則意氣不洽而家睽故天道下濟地道上行網緼訢

合以生萬物交也者天地之所不能違也而况於人乎
人臣懷忠信之心抱匡濟之畫孰不欲委質清時結心
明主然而冠履之分嚴而宮庭之地隔其情易渙而其
勢易踈也明主知其然故首出庶物而下芻蕘兼制四
海而先誓御朝而議政坐而論道所以優體也虛懷而
聽造膝而籌所以致親也日晏侍食夜分徹炬所以示
渥也辟左右借顏色披衷愫忘忌諱所以盡情也君資
於內曰爾惟麴蘖爾惟鹽梅臣順於外曰斯謀惟后斯
猷惟后所以一德也泰九二以剛中應五而六五柔中
虛已以從之此之謂君臣之交故泰之初拔茅彙征與

共開焉泰之極艱貞無咎與共保焉二言所爲五不言所爲二臣道也以任事爲忠五君道也以任人爲大二勝其任則五可無爲故曰以祉元吉而已此之謂君臣交而爲泰也夫都俞咨命喜起賡歌唐虞尚矣三代相與載在詩書君臣之情猶可想見由漢而下肇造元勳中興名佐代固有之然率外合而中疑文具而情闕建武數引公卿講論而責以吏事則其體失也貞觀宰相入閣議事而隨以諫官則其中疑也慶曆龍圖天章閣降手詔給筆札而固辭不對則臣負其君也治平中司馬光請命侍從輪直資善堂夜宿崇文院以待宣召而

率未行則君負其臣也何以庶幾於交泰哉愚嘗伏讀大詔首君臣同遊曰歷代君臣同心一氣立綱陳紀昭示天下爲民造福是以感格天地時和年豐家給人足大哉 聖謨我 皇祖 列聖之所以交羣臣而昌泰運者率用此道矣請陳其畧 高皇帝延攬英賢廓清華夏所與參密議而贊鴻猷者時則有若基若濂若安若禕若溢若琛若彥良其人焉 文皇帝親禮儒碩綏靖邦家所與商幾務而從征討者時則有若縉若廣若淮若儼若榮若士奇若幼孜其人焉夫天造草昧干戈不遑家難劬勩創夷初起而 君臣之相與如此是

以神流氣鬯天地太和延及羣生施於方外而一代之
鴻圖定矣所謂開天地之泰者非邪 列聖相承久安
治宣弘之際尤稱郅隆 章皇帝心存無逸耆舊不
遺閣臣則若榮若士竒若溥部僚則若義若原吉若淡
齋宮便殿召對者數矣至於登山泛舟 賜章給饌
一則曰同心同德兩無嫌猜一則曰以遊以豫庶幾古
昔又何其歡洽也 敬皇帝志大有爲老成具在執政
則若溥若健若東陽若遷臺省則若文升大夏若珊
平臺煖閣 召對者數矣至於 天顏開霽 廟算周
詳䟽擬則或更數字或削數語執奏則或移晷刻或至

累日又何其披豁也夫奕葉承平法守已定庶事循習
玩愒易生而 君臣之相與如此是以神流氣鬯天地
太和克篤 前烈施於后昆而萬世之長策建矣所謂
保天地之泰者非邪當其時 主無貳任臣無隱忠歡
忻交通而德威宣暢故論開濟則功軼於姬妣頌熙洽
則治匹乎唐虞而一時名臣碩輔幸逢 昌運亦得以
勤勲德於旂常垂功名於竹帛猗歟休哉真千載一時
之遇也今 天子光撫鴻圖祇遵 成憲 講學臨政
寒暑必親嘉言忠謨聽納靡倦公卿百執事相與勵翼
於下而 天子恭已南面以聽之內寧外謐時和年豐

黠虜來庭炎荒奏凱斯亦泰運之再昌已而執事尚欲
聞保泰之說則愚將何詞以獻乎竊以爲欲登太平之
理莫若致隆於上下之交欲隆乎上下之交莫若憲章
乎 召對之典夫人情狃於法之所常行而惕於意之
所間舉今辨色而入日出而 視之頃刻而退矣習則
玩玩則不可振故不若問一 召對之爲益也蓋有六
善焉閱世務一也察材品二也明 德意三也密事幾
四也定 國是五也激忠悃六也請得實以 祖宗故
事熟數於前而執事試垂聽焉夫人主雖神聖睿智而
四方庶務弗能周也錢穀刑獄各有主者 召而問之

則幽隱畢達故屯田鹽法欲計其宜而臨淮洛陽得畢
慮於下矣邊備虜情欲定其算而鈞陽華容得決爽於
前矣故以閱世務則率作考成可弗眩也夫退而具疏
則詞可飾也思而陳詞則端可匿也惟卒然問之心術
立見能否吳逃故呂震與儀智並對而諛直見楊士奇
與蹇義並對而遲敏見故以察材品則明闇回正可弗
欺也 上意猶的也射者爭趨之故諸司奏請必令稽

臬侍臣以此知 上意之在守法 召問天下何時
平朕安得如古帝王大臣以此知 上意之在興治
德意則措注嚮往可弗違也夫造膝而密語

以先傳也從容而納誨者不可以牘盡也假令
廣 詔條而可令多人知乎出殿帖議改 命可外
乎故以密事幾則轉移變化可弗窺也衆議畢集可
官易淆不惟儉夫與正士殊科卽君子意見亦有同異
如移師彰德楊榮以爲是士奇以爲非舉伏伯安爲使
蹇義以爲可原吉以爲不可黎利請立陳氏後張輔蹇
夏曰勿許榮士奇曰許之此其心皆體國而所見各殊
惟折以 宸衷則衆論一矣故以定 國是則盈庭聚
訟可弗亂也夫入侍 帷幄出奉 乘輿內寄腹心外
資謀斷人人自以爲親已矣有 君如此其恐負之

祖宗朝札與盛事藏在 秘府 總不得徧觀卽如泰和
長沙李容之所私錄毗倚 眷顧迄今誦之猶爲感動
况親當其盛者乎故以激忠悃則銜恩幸遇可弗負也
斯六善者皆已事之明驗蓋於法制常行之外而時用
吾鼓舞不測之權故 聖智日益觀聽日新賢才樂爲
之用而天地常泰且初雖似勞久而情誼洽彌見其適
似煩久而要領得彌見其簡又何煩勞之有愚又
聞 二祖諸臣皆從事乎草昧劬間而宣德弘治所
禮乃其輔導之舊蓋未 登大寶而相與已素矣且
載 諸臣面對其 召也雖內侍不及

惟不言言以雍 沉幾觀變是惟

宸衷獨發固不可測也今 上厲精圖

臣益明習 國家事且將舉 祖宗故典以

熙朝盛美蓋有待焉草莽愚生傾心拭目於是舉

也久矣若釋此而他求 保泰之道則愚何知焉

